

2 Corintios

Jacheuayama

¹ Atše Pablo, Jesucristbe canye ichmoná, Bëngbe Bëtsá atše chca jtsemnama yojánbošeyeca, Jesucristbeyeca bëngbe catsata Timotéoftaca quem tsbuanácha sentsabiamná, Corinto puebloca Bëngbe Bëtsábeñe ošbuachiyëngcá enefjuanëngbiana, y nyets Acaya luarentše Bëngbe Bëtsabe nyetsca entsangbiámnaca.

² Atše sëntseimpadana Bëngbe Bëtsá Bëngbe Taitá y Bëngbe Utabná Jesucristo, chaboma tsëngaftangbeñe tsabe bendicionënga chaotsemnama y ainaniñe tsabe ebionana chašmotsebonnama.

Ntšamo Pablo tojansufrí

³ Bënga mochtsatschuanaye Bëngbe Bëtsá, chë Bëngbe Utabná Jesucristbe Taitá, bëngbe Taitá, chë bëngbiana lastemado yomná, y ndaye padecena soyënguiñe tmojtsemna ora, bënga šondbetsañemuayá.

⁴ Cha bënga jtsañémuayana padecena soyënguiñe tmojtsemna ora, chca, bënga chamotsobenama chë tmojtseufrinënga jañémuayama, ntšamo Bëngbe Bëtsá šojujabuachcá chënga jujabuáchëse.

⁵ Er ntšamo Cristo tojansufricá, bënga tša fsëndësufrina chabiana oservëniñe; cachcá, Cristbeyécnaca Bëngbe Bëtsá jamana bënga puerte añemo ainaniñe fchaitsebonnama.

6 Er bënga tmojtseufrínëse, jtsemnana bënga jobenayama tšëngaftanga jañémuayama chë šmojtseufrina ora, y atsebácanënga chašmotsemnana, Bëngbe Bëtsabe soyëngama jouenëse. Chë padecena soyënguiñe tmojtsemna ora Bëngbe Bëtsá šojáñemose, jtsemnana bënga fchayobenama tšëngaftanga jañémuayama, padecena soyënguiñe šmojtsemna ora. Chca, bënga jobenayana tšëngaftanga jujabuáchana, Bëngbe Bëtsábeñe chašmotsobátmanama, chábeñe jtsošbuáchiyëse, y lempe jtsóboyayama, ntšamo bënga fsënjasufricá šmojtseufrina ora.

7 Bënga sempre fsëndobátmana y tšabá fsëndétatsëmbo chë padecena soyënguentsana tšabá šmochjábocanama, er bënga fsëndétatsëmbo, chë ntšamo bënga fsënjasufricá tšëngaftanga šmojasufrima; y cachcá, Bëngbe Bëtsá yochjama tšëngaftanga ainaniñe puerta añemo chašmotsebomnana, ntšamo bënga fchaitsebomnana cha tojamcá.

8 Jesucrístbeyeca atšbe catšátanga, bënga fséntseboše tšëngaftanga chašmotsetátšëmbo ntšamo bënga Asia luaroca tša fsënjansufrínama. Bënga puerta padecena soyënguiñe fsënjaninyena, nya ndoñe más jauantacá, chentsana vídaca jabocanama ntjatobatmancá.

9 Bënga šontsanëñana mo jóbanama cuaftsamncá. Pero chë soye tonjanoservé, bënga jtsošbuáchiyama Bëngbe Bëtsábeñe, nda inétsama obanënga chámuatayenama, y ndoñe cabëngbeñe ntsošbuáchiyana.

10 Cha šojatsebacá bënga jóbanama puerta

resjo enjamnentšana, y cachcá šochjátsebacaye bēngbiana cachiñe cachcá tša resjuiñe chamojtsemna ora. Bēnga puerte chábeñe fsēndobátmana, puerte padecena soyēnguiñe bēnga chamojtsemna ora, cha cachiñe šochjátsebacama.

11 Tšēngaftángnaca cmontsamna bēnga jujabuáchana, bēngbiana Bēngbe Bētsá jaimpádase; chca, ba entšanga Bēngbe Bētsá mochanjētschuaye, er cha tojama bēnga chábentšana tšabe bendicionēnga fchayóyēngacñama, cha jamēse ntšamo chēnga bēngbiana tmojanimpadacá.

Ndáyeca Pablo Corinto puebloye ndoñe tonjána

12 Canye soye endmēna ndayá oyejuayēnga šojtsabiamná: bēnga bēngbe ainanentša juabnēngaca jtsetatšēmbuana puerte tšabá jtsamēse fstsiyena ca, ntšamo chē Bēngbe Bētsabe entšanga endbetsamncá, nýetsca quem luarentša entšángbeñe, y más tšēngaftangbeñe, y bēnga jtsetatšēmbuana ntšamo tšabá tifjamcá nýets ainánaca tifjamama. Bēnga tondaye chibiatsma quem luarentša entšangbe osertanánaca, ndayá Bēngbe Bētsá tša tšabia bēngaftaca bétsemnayeca, šojújabuache chca chamotsiyenama.

13 Er ntšamo fsēntsabiamnamna ndoñe queftsátsboše, ntšamo tšēngaftanga šmojtsalía y cmojtsēsertánentšana inýetsá játayanana, y sēntsobátmana puerte tšabá lempe chacmósertama.

14 Mora ndayá atše stsamama ndoñe lempe quecmátēsertana. Pero atše sēntseboše tšēngaftanga chama corente chacmósertama; chca, Bēngbe Utabná quem luaroye chaojésabo ora, tšēngaftanga bēngbiana oyejuayēnga

chašmotsemnama, ntšamo bëngnaca tšëngaftangbiam a oyejuayënga fchantsemncá.

15 Chca ndegombre yomnama atše sëndëtatšëmboyecca, atše sënjanjuabná tšëngaftangbioye jshétsana jányama, y chca, chë tšabe soye tšëngaftangbiam a uta soye jamana, tšëngaftangbioye uta soye jányëse.

16 Atše sënjanjuabná tšëngaftanga jshaftsanyana, Macedonioye ayiñe chëjana matijánachnëngo ora; y chentšana, ya camoye ataboye ora, tšëngaftanga cachiñe jáftsanyana. Chca, tšëngaftanga mašmëñjanobená atše juajabuáchana Judea luaroye játama.

17 Atše chca jamama tsjanjuabná ora, ¿chca tijanma ndoñe corente tšabá ntjenjuaboycá? ¿Tšëngaftanga šmatjájuaboye, ntšamo nye quem luarama enójuabnaye entšanga monduamancá, cachora canye soyama “aíñe” y “ndoñe ca” jayanëse, atše ndayánaca jamama snëtsejuabnaye ca?

18 Canye soye ndegombre endmëna: Bëngbe Bëtsá sempre endbama ntšamo tojayancá, y chca puerta ndegombre endmënayeca, atše ndayánaca chjama ca stjayana ora, chca ndoñe questsbatayana chentšana atšbe juabna jatstrócama, mo canya cachora canye soyama “aíñe” y “ndoñe ca” cuafjatichamcá.

19 Er Cristo Jesús, Bëngbe Bëtsabe Uaquiñá, ndabiam a Silvano, Timoteo y atše tšëngaftangbeñe fsënjanabuayiyá, ndoñe ntsejuabnayana canye soye jamama y chentšana jatsjuabnayana inyetsá jatsmama, mo canye entšá cachora canye soyama “aíñe” y “ndoñe ca” cuafjatichamcá, ndayá chana

n̄yets tempo ntšamo tojtsejuabnacá jayanana y jamana ntšamo ndegombre yomncá, chentšana ntjatstrocyá.

²⁰ Er ndayá cha tojamiñe, lempe ntšamo Bēngbe Bētsá tojašebuachenacá jocúmpliana, mo chē lempe ntšamo Bēngbe Bētsá tojašebuachenama cha “aíñe ca” cuaftsichamcá. Chíyeca, Bēngbe Bētsá bēnga tmojtsatschuaná ora, Cristo Jesúsbeyeca bēnga jayanana “chca chaotsemna ca”.

²¹ Pero Bēngbe Bētsá endmēna nda inétsama bēnga y tsēngaftanga puerte Crístbeñe chamot-sošbuáchema, cháftaca cán̄yiñe mo can̄yacá jtsemnēse; y Bēngbe Bētsánaca endmēna nda bēnga šojabacacá chabe entšanga chamotsemnama.

²² Cha tojama chē Uámana Espíritu bēngbe ainaniñe cháuamashēnguama jtsemándayama, y chē soye jtsin̄yan̄nayana bēnga Bēngbe Bētsabe entšanga imomnama. Y bēngbe ainaniñe chē Espíritu imobóm̄nayeca, bēnga corente jtsetatšēmbuana bēnga mochjójyēngacñama lempe ntšamo Bēngbe Bētsá bēnga jatšatayama sojašebuachenacá.

²³ Bēngbe Bētsá entson̄yá atše ndegombre stsichámuama. Atše Corinto puebloye cabá ndoñe chiyjá, er atše ndoñe quetsátsboše tsēngaftanga jašēchnana, chē bacna soyēnga šmojamama, tchojaucacánēse.

²⁴ Bēnga ndoñe queftsátsboše tsēngaftanga jamēndana ndayiñe cmojtsamna jtsošbuáchiyana; er tša šmojtsošbuachéyeca, ndoñe quešmochatajbaná Crístbeñe jtsošbuáchiyana. Bēngbe fsēntseboše ndayá

tšëngaftanga jujabuáchana, corente oyejuayënga chašmotsemnama.

2

¹ Chíyeca atše ndoñe chiyjá jautsëtsayama, er atše sënjanjuabó y sënjanéniyana choye ndoñe jama ca, bacna soyënga šmojtsanmama jábuayenama, y chca, ngménënga játabiamana, ntšamo chanýe sënjamcá.

² Tšëngaftanga ngménaca chašmotsemnama atše stjamëse, ¿nda yochjama atše oyejuayá chaitsemnama, sinó nýe tšëngaftanga, chë atše ngménënga tijábiamënga?

³ Chíyeca tcbonjanëbuábiamana chë ntšamo šmojualiácá, chca, atše choye stjáshjango ora, tšëngaftanga átšbioye ndoñe ngmená chašmondëbemama. Chca játamamna, tšëngaftangbiamana más tšabá endmëna oyejuayá atše chašmobema. Atše tšabá sënjántatsëmbo ndayá átšbioye oyejuayá šojabemcá, tšëngaftángnaca chca mašmënjánbošena y oyejuayënga chë soye matcmënjánabiamana. Chíyeca atše ndoñe chiyataná, nýetscanga oyejuayënga jtsemnama ndoñe quenjatopodena ora.

⁴ Pero chë tsbuanácha tcbonjanëbuábiamana ora, atše corente šonjanongmé y ainana šonjántsetšena chca jabuache soyënga tšëngaftanga jubuábiamama, y chca jamama shëchbuíynaca sënjanoperdé. Pero atše ndoñe checbátanëbuabiamana atše jatsmama tšëngaftanga puerte ngménaca chašmotsemnama, ndayá chašmotsetatšëmbuama atše tša cbababuánýeshanama.

Perdón chë bacna soye amabiamna

⁵ Y mora, chë tsëngaftangbeñe puerte ngménana chaotsemnana tojama boyabásabiamna, cha átšbioye ndoñe ngmená chešnátšbema, ntsachetšá tsëngaftanga tcmojabiamná, ínÿengbioye ínÿengbiamna más. Chca séntsichamo, er atše ndoñe quetsátsboše jayanama ntsachetšá tojamama cha más bacna soye tojama ca.

⁶ Banga tsëngaftanguentsënga ntšamo šmojamná, chë entsabiamna ya bëts castigo entsemna. Nÿe nÿetšá ponto.

⁷ Chamna, ndayá mora cmojtsamna jamamna entsemna, cha jtseperdónana y jañémuana, chca, ndocna tsabe soye jamama ndobená ndoñe chaondëtsemnana, chë castiguama puerte ngménaca bëtsemna causa.

⁸ Chiyeca, tsëngaftanga cbaimpadá cachiñe tsabá chašminÿinÿé chábioye corente šmobobonshánama.

⁹ Tempo ya chama tcbonjanëbuábiamna, atše jinÿama tsëngaftanga aíñe o ndoñe šmontsanprontánama, lempe ntšamo tcbonjanamëndacá jamama.

¹⁰ Chcasna, ndánaca ndayánaca tsëngaftanga chašmojaperdoná ora, átšnaca cha chantseperdóna. Y atše cha chantseperdóna, ndayá japerdónama ndegombre tojtsemnëse. Y chca chanjama tsëngaftangbe tsabiamna y Cristbe delante.

¹¹ Atše tsëngaftangná, quem entsábioye šcoperdoná chë bëngbiamna tojama bacna soye; chca, Satanás ndoñe chaondobenama bënga jáingñama, er bënga mondëtatšëmbo cha inëtseboše

ndaye bacna soye entšá chaotsamama.

Ndáyeca Pablo ndoñe natjěmbana Troas puebloca tontsanoquedañe

¹² Atše Troas puebloca sěnjánashjango ora, Cristbe tšabe noticiěnga jábuayenama, atše sěnjáninýe Běngbe Utabná tojanma chentše banga chě buayenana soye chamouenama y chěngbe ainaniñe chana chamóyěngacñama.

¹³ Masque chca enjamna, atše ndoñe quetstětsobena natjěmbana ainana jtsebomnana, er atše sěnjanjuabná Jesucristbeyeca běngbe catšata Tito chentše jinýenana, pero ndoñe chca. Chýyeca, Troas pueblentša entšanga sěntanadiosoftaná, y Macedonia luaroye sěnjána.

Crísoftaca cánýiñe mo canýacá jtsemněse, běnga mo ayěňjanayěngcá jtsemnana

¹⁴ Atše Běngbe Bětsábioye sěndbětsatschuanaye, běnga bacna soyěnga jamama juabněnga cha tojaněyěňjanama, tempo šojanaměnda juabněnga; y chě mora běnga Crísoftaca cánýiñe mo canýacá jtsemněse, nýets tempo cha šnetsěnachayama, mo canýe ayěňjanayacá, y chě nýets luarenache entšanga Cristbiana soyěnga chamotsábuatmama běngaftaca cha yojsamama, mo nda canýe botamana uanguětše soye nýets luarěnguenache chauáshanama cuaftsamcá.

¹⁵ Er chě incienso tojtsejuínýňana ora, entšábioye tšabá juanguětšenana; cachcá Cristbe tšabe noticiěnga fstsabuayiyná ora, Běngbe Bětsabiana běnga jtsemnana chě nděmuanýenga tmojtsama cha oyejuayá chaotsemnana. Incienso tcojtsejuínýná ora, nýetscángbioye

juanguëtšenana. Cachcá, Bëngbe Bëtsabe palabra fstsoyebuambná ora nÿetscanga jouenana, Cristo yojtsatsebacanga y chë pochocánënga jtsemnama imojtsajnëngnaca.

¹⁶ Chë pochocánënga jtsemnama imojtsajnënga, pochocánënga mochanjábocana, er ntšamo bënga fsëndabuayiynacá y tmojouencá chënga tmojtsaboté; y chca, chëngbiana chë tšabe noticiënga jtsemnana mo canÿe obanabe uanguëtšancá. Pero chë Cristo yochjátsebacangna, tšabe noticiënga tmojóyëngacñeyeca, mochanjobenaye tšabe vida nÿets tempo jtsebonnama; y chca, chëngbiana chë tšabe noticiënga jtsemnana mo canÿe puerte botamana uanguëtšancá. Y asna, ¿nda obenana yojtsebonna chë tšabe noticiënga jábuayenama trabajo jtsemama?

¹⁷ Bënga chë tšabe noticiënga ndoñe queftstabuayiyná, ntšamo ba entšanga imojtsamcá, mo nÿe batšá uámana soyënga cuaftsemncá, y ndayánaca juácanama, mo nda ndaye nduámana soyënga cuaftsencá. Banga chca mondama; bënga ndoñe. Bënga, Crísoftaca cánÿiñe mo canÿacá jtsemnëse, fsëndabuayiyná mo Bëngbe Bëtsabe delante cuaftsemnëngcá, ndegombre nÿe ntšamo tšabá yomncá nÿets ainánaca jtsebošëse, y mo Bëngbe Bëtsabe ichmonëngcá.

3

Chë Bëngbe Bëtsabe tsëm tratama buayenana soye

¹ Chca bëngbiana fstsjayana ora, tšëngaftanga cmojtsinÿana ¿bënga cachiñe tiftëtontsé cabënga bëtsëtsanga enobiamnayana? ¿0

bënga šojtsamna, mo injengcá, tšëngaftanga juyentsbuáchiyana o juátjañana tsbuanachangá, bënga tšabá fstsamama chëchangaca jinÿanÿiyama?

² Bënga bëngbe ainaniñe puerte tšabá fsëndétatsšëmbo, nÿetsca entšanga, ntšamo tšëngaftanga jtsamëse šmoyencá tmojinÿe ora, tšëngaftanga jtsinÿanÿnayana bënga ndegombre ntšamo tšabá yomncá fstsamama. Chca, tšëngaftanga jtsemnana mo canÿe tsbuanachacá, nÿetscanga jtsabuatmana y jtsobenana jualiana, bënga tšabá fstsamama.

³ Nÿetscanga tšabá mondétatsšëmbo Cristo tojanma tšëngaftanga chábeñe chašmotsošbuáchema, y bëngaftaca cha chca tojanmámna. Chca, tšëngaftanga šmondmëna mo Cristbe canÿe tsbuanachacá, ndayëcha quem luarentša entšángbioye tojuyentsbuaché bëngaftaca. Tšëngaftanga ndoñe chešmatanobená Crístbeñe ošbuáchiyënga jtsemnana entšangbe trabájoca, er Crístbeñe šmonjanošbuaché chë Bëngbe Bëtsá Ainabe Espíritbeyeca; y chca, tšëngaftanga šmondmëna mo canÿe tsbuanácha cháftaca uabemanëchacá, y ndoñe mo entšángbeyeca uabemana tsbuanachacá. Bëngbe Bëtsá chë mandënga ndëtšbé tablëbenguñe tojanábema, entšanga chamotsobedecënama, pero tšëngaftangna Cristbe buayenana soye tšëngaftangbe ainaniñe šmojóyëngacñe.

⁴ Crístbeyeca Bëngbe Bëtsábeñe jtsošbuáchiyëse, bënga corente fsëndétatsšëmbo chca ndegombre bëtsemnana.

⁵ Ndoñe quenátsmëna, nÿe bënga cánÿenga quem

trabajo jamama fstsobena y játayanana bēngbe soye chē trabajo yojtsemna ca, er bēnga jtsohenana chca jamama, n̄ye Bēngbe Bētsabe ujabuáchenanaca;

⁶ er cha tojama bēnga fchayobenama quem trabajo jamama, chē entšanga jábuayenana Bēngbe Bētsá chabe entšángbioye tojanašebuachená soyēngama, ndayá Cristo tojanma sóyeca, mo can̄ye tsēm tratcá, Bēngbe Bētsá y chabe entšángaftaca. Quem soye ndoñe quenátsmēna mo chē Bēngbe Bētsá tempo Israeloca entšángbioye léyeca tojanašebuachená soyēngcá. In̄yetsá; entšanga mondama Bēngbe Bētsabe tsēm trato, Uámana Espíritbeyeca. Chē natsana trato, chē uabemana ley, ntšamo chiñe iuabemancá ndoñe tconjama causa, entšá jóbanama jtsemnana; pero Cristbe tšabe noticiēnga, chē tsēm trato, entšanga ainaniñe tmojóyēngacñe ora, chē Uámana Espíritu jamana, chē n̄yetsca tescama yomna tšabe vida chēnga chamotsebomnama.

⁷ Quem Moisesbe ley, chē ndoñe tmonjobe-decema entšanga jóbanama jtsamnana, ndētšbé tablēbenguiñe letrēngaca tmojanábema, y Bēngbe Bētsá Moisésbioye tbojanantsabuaché ora, cha tša buashin̄yin̄yaniñe tojánabo. Chē causa entšanga ndoñe imontsobena ni mo jin̄yana Moisesbe jubiá, er tša ibojtsanjuebēbuashin̄yin̄yana, Bēngbe Bētsáftaca tbojánencuententšana tojtanabo ora. Pero betesco tojanéjbana chē jubiá chca buashin̄yin̄yanana. Chē ley, chē natsana trato, Bēngbe Bētsá tojanayentšbuaché ora, tša buashin̄yin̄yanánaca cha tojanmēse;

⁸ ndegombre, más bēn y uámana tempo entsemna chē Bēngbe Bētsá bēnga

šojanašebuachená tsëm soyënga yojtsama ora, chë Uámana Espíritu bëngbe ainaniñe cháuamashënguama Bëngbe Bëtsá tojama ora.

⁹ Bëngbe Bëtsá chë ley tojanayentsbuaché ora, chë ndáyeca entsanga jóbanama yojánamna, ntšamo chiñe betsayancá ndoñe tmonjama causa, chora cha chca tojanma puerte chabe buashinÿinÿanana jinÿanÿiyëse; ndegombre más bën y uámana tempo entsemna chë mocna ora Bëngbe Bëtsá yojtsama entsanga chabe bominiñe tsábenga chamotsemnama.

¹⁰ Er chë Bëngbe Bëtsá ley tojanayentsbuaché ora tojaninÿanÿé buashinÿinÿanana, mora jtsinÿnana mo ya tondaye cuabndëtsemncá, chë Bëngbe Bëtsá entsangbiamama tsëm soyënga tojtsamama tcojtsonÿá ora, chë tša buashinÿinÿanana yojtsemna ora.

¹¹ Er chë leyama tempo, chë ya jochnënguama tempo entsemna ora, Bëngbe Bëtsá chabe buashinÿinÿanana y uámanana tojinÿanÿese; ndegombre chë Bëngbe Bëtsá tsëm soyënga entsangbiamama jamama ora, chë ndocna te yochanjochnëngo tempo ora, Bëngbe Bëtsá más chabe buashinÿinÿanana y uámanana echántsinyanÿnaye.

¹² Y chca, Bëngbe Bëtsá chca bëts soyënga yochjamama fsëndobatmánayeca, bënga fsëntsobena jóyebuambayama, nÿetsca soyëngama jayanëse, tondayama ntjatauatjá.

¹³ Y chca, bënga ndoñe Moiescá queftsátama, chë chabe jubiá chaobuashinÿinÿenama Bëngbe Bëtsá tojanma ora, canÿe entsëjuaca yojtsenamochécjua; cha chca tojanma, chë Israeloca entsanga ndoñe chamondobená jinÿama chë jubiá

buashinÿinÿanana ya yojtsëchnëjuana ora.

¹⁴ Pero Bëngbe Bëtsá tojanma chënga ndoñe chaondósertama ntšamo Moisesbiajana cha tojanayancá. Y cabá quem tempo, ntšamo Bëngbe Bëtsá Moisésbioye tbojanšbuachenacá chëngbiana jamama, Israeloca entšanga tmojtsalía ora, ndoñe ntsësertánana Bëngbe Bëtsabe ndegombre soyënga, mo chëngbiana iytëmena soyënga cuaftsemncá, mo chë Moisés yojtsenamochëcjua entšëjuacá. Y chca endmëna, er nÿe Crísoftaca cánÿiñe mo canÿacá jtsemnëse, chënga jtsobenana chë soyëngama jósertana, y iytëmencá ya ndoñe ntsemnana.

¹⁵ Y méntscoñama, Moisesbe librëšangá chënga tmojtsalía ora, ndoñe ntsësertánana Bëngbe Bëtsabe ndegombre soyëngama, ntšamo chiñe tojtsayancá jamama ndoñe montseboše causa.

¹⁶ Pero canÿe entšá chë Bëngbe Utabnabe benache tojishache ora, cha jtsobenana chë soyëngama jósertana.

¹⁷ Y Bëngbe Utabná y Espíritu canÿa bondmëna, y Bëngbe Bëtsabe Espíritu tojtsemnentše, chë bacna soyënga jamama juabnënga, ni chë ley ndoñe ntsemándayana.

¹⁸ Moisés chabe jubiañe Bëngbe Bëtsabe buashinÿinÿanana y uámanana tojaninÿanÿé, y chíyeca, canÿe entšëjuaca yojtsenamochëcjua, chca, chënga ndoñe chamondinÿama. Pero bënga ošbuáchiyënga nÿetscanga jtsinÿanÿayana Bëngbe Utabnabe buashinÿinÿanana y uámanana, mo canÿe espejo canÿe soye tojtsinÿanÿnacá, y ndoñe queftsátsboše ntšámnaca jamëse chë soye jatsëytamianana. Cha bëngaftaca yojtsama

cada te más chë ntšamo cha yomncá bënga chamotsemnana, cada te más bëtsëtsanga chë ntšamo cha yomncá jtsemnëse. Chca endmëna ntšamo Bëngbe Utabná yojtsama; y Bëngbe Utabná y Espíritu canÿa bondmëna.

4

¹ Y chca, Bëngbe Bëtsá bëngbiana lastemado yómnyeca, quem trabajo šojabanÿé, jtsabuayiy-nayama chë Crísoftaca tojašebuachená soyënga; y chíyeca bënga ndocna te ntjájbanana ainaniñe añemo bomnana.

² Bënga fsëntsaboté chë ínÿenga iytëmencá immétsama soyënga, chë ínÿenga tmojinÿe ora chama jtsëuatjana, y chë ínÿenga entšanga jáingñama immétsama soyëngnaca, y Bëngbe Bëtsabe buayenana soye ndoñe queftsatstróca ndoñe ndegombre soyëngaca. Chamna, bënga sempre nÿe chë ntšamo ndegombre yomncá fsëndbëtsoyebuambnaye, mo Bëngbe Bëtsabe delante cuaftsemnëngcá jtsamëse; y chca, bënga fsëndbëtsama cada entšabe ainanentša juabnënga chamuayanama, bënga ndegombre soyënga fstsoyebuambná ca.

³ Y nderado bënga chë tšabe noticiënga fstsabuayiyná ora, báseftanga chë soyënga chaósertama ndoñe tontsopodénëse, nÿe chë pochocánënga jtsemnana tmojtsajñëngbiana chca jtsemnana.

⁴ Chëngbiana, chë Crístbeñe ndošbuáchiyëngbiamna, chë quem luarentse mora mandayá, Satanás, tojama chë buayenana soye ndoñe chaondëtsësertánama; chca, chënga ndoñe

chamondinŷama chë tšabe noticiënguentsana puerte bëts y tšabe soyënga, chë Cristo puerte bëtsá y obená yomnama ínŷanŷnaye soyënga, nda nŷetsca soyënguiñe Bëngbe Bëtsacá yomna.

⁵ Bënga ndoñe nŷe cabëngbe soyama queft-satabuayiyná, ndayá Jesucristbiamama mo Bëngbe Utabnacá. Bënga bëngbiamama fsëndbáyana mo oser-venëngcá fstmëna ca, tšëngaftanga jujabuáchama; y chca fsëndbëtsama Jesús jasérviamama.

⁶ Er Bëngbe Bëtsá, nda quem luare jobojátšama ora tojanmandá binŷniñe ibetentsana chaóboconama, chánaca tojama bënga ainaniñe tšabá chabe soyëngama chašotsësertánama, chca bënga fchayobená juabuátmanana chë Bëngbe Bëtsabe uámanana y obenanentsana inétsobocana osertánana, ndayá Crístbeñe bënga mondonŷá.

Bënga fsëndoyena Crístbeñe jtsošbuáchiŷe

⁷ Pero chë puerte tšabe y bëts soye, chë Cristbe buayenana soye, bënga mondbomna cuerpiñe, bëngbe ainaniñe; y chë cuerpënga jtsemnana nŷe mo matbajëngcá, ndoñe yapa obenana ntsebomnana, chca, jinŷanŷiyama tša bëts obenana Bëngbe Bëtsábocana yóbocanama, y ndoñe bëngbentsana.

⁸ Y chca, bënga nŷetsca padecena soyënguiñe vida fsëndbomna, pero ndoñe queftsátsmëna ndobenënga chë padecena soyënguentsana tšabá jabocanama; ndoñe queftsátstatsëmbo ndayá jamama šojtsamna, pero ndoñe queftsátsmëna ntsobencá jtsobátmanama quem padecena soyënguentsana tšabá jabocnana.

⁹ Inŷenga montsama bënga puerte fchaisufrima, pero Bëngbe Bëtsá ndoñe nŷe cachcá

šontsabashejuana; mo nda ínÿabioye cuafjutsencá tmojtsentsjaná ora, ya jóbama jtseprontánana, uayayënga bënga jtsëbáyama imojtsejuabnangbe cucuatšiñe fsëntsemna, pero cabá ndoñe ntjobáyana.

¹⁰ Inÿenga sempre jtsamana bënga bëngbe cuerpiñe puerte fchaisufrima, y jobanámnaca resjo jtsemnana, ntšamo Jesúseftaca tmojanmcá, cha chaosufrima y chaóbanama. Chca bëngaftaca endopasana, chca, ínÿenga chamobená jinÿama Jesús bëngbeñe vida yobomnama.

¹¹ Er bënga vida fchabomnëntscuana, sempre puerte resjo bëngbiana jëftsemnana jóbana, Jesúsbioye servena causa; y chca endmëna, ínÿenga chamobená jinÿama Jesús vida yobomnama bëngbe cuerpiñe, chë canÿe te yochjopochóca cuerpo.

¹² Y chca, bënga tša fsëndësufrina y jobanámnaca resjo endmëna; y tšëngaftanga tšabe noticiënga šmojóyëngacñayeca, Bëngbe Bëtsá tojama chë nÿetsca tescama yomna tšabe vida chašmotsebojnama.

¹³ Bëngbe Bëtsabe uabemana palabrënguiñe endayana: “Atše sëntsanošbuaché y chíyeca sënjanoyebuambá ca.” Bënga cachca ošbuáchiyana fsëndbomna chë chca tojanayanacá, y chíyeca bëngnaca Bëngbe Bëtsábeñe fsëntsošbuaché y chabiamana fsëntsoyebuambná.

¹⁴ Er bënga fsëndëtatšëmbo, Bëngbe Bëtsá, nda tojanma Bëngbe Utabná Jesús cháuatayenama, chánaca yochjama bënga Crístoftaca cánÿiñe mo canÿacá jtsemnëse, bënga chámuatayenama, y tšëngaftangftaca cánÿiñe cha yochtsemnoye

šochjúshejango.

¹⁵ Lempe ntšamo bēnga fstsama y fstsesufrincá tšēngaftangbe tšabiama endmēna; chca, más becá entšanga chábeñe chamojtsošbuaché ora, ba tšabe bendicionēnga Bēngbe Bētsá entšangbiana jtsamēse, más becá entšángnaca chábioye chamotsatschuaná, ndayá chēngbiana cha yochjamama; y lempe chca, Bēngbe Bētsá puerte uamaná y obená yomnama nŷetsca entšanga chamotsichámuama.

¹⁶ Chíyeca bēnga ndoñe ntjájbana anaianiñe añemo bomnana. Masque quem luarentša bēngbe cuerpo cada te jtsopochócyana, Bēngbe Bētsá jamaña chē bēngbentšana nŷets tempo vida yochtsebmna soye, cada te más obenana chaotsebmnama; y chca, bēnga jtsemnana mo tsmēma entšangcá.

¹⁷ Ntšamo bēnga mora fsēndēsufrincá endmēna nŷe quem luarentše vida tmojtsebmñentscuana, y chca, chē soye jtsemnana mo canŷe nduámana soycá; pero ntšamo bēnga fsēndēsufrincá josérviana bēnga jtsebmnama chē Bēngbe Bētsá šochjatšataye puerte bēts uámanana y obenana, cháftaca nŷets tempo vida jtsebmnama, chē ndayá yomna nŷetsca soyēngama más bēts y uámana soye.

¹⁸ Er bēnga nŷe chē tojtsopodena jinŷama soyēnguiñe ndoñe nŷets tempo queftsatsjuabná, ndayá chē ndoñe yondopodena jinŷama soyēnguiñe; er chē bēnga imobena jinŷama soyēnga ndoñe nŷetsca tescama ntsemnana; pero chē bēnga ndoñe mondobena jinŷama soyēnga cocayé nŷetsca tescama jtsemnana.

5

¹ Bënga mora mondbomna canÿe cuerpo quem luarentşe vida jtsebomnama. Quem cuerpo yomna mo chë jtsatsjacama yopodena yebncá, cánÿentşe ndoñe nÿets tempo ntjëftsemnana. Bënga mondëtatşëmbo, quem cuerpo canÿe te tojtsopochocase, Bëngbe Bëtsá yochjama bënga tsmëma cuerpënga chamotsatsbomnama, celoca nÿetsca tescama vida jtsebomnama, Bëngbe Bëtsabe pormana cuerpënga y ndoñe entsangbe pormana cuerpënga.

² Chíyeca, bënga quem luarentşe chca vida tmojtsebomnëntscuana, yapa tmojtsesufrina causa, bënga tşa jtseboşana betsko Bëngbe Bëtsá celoye chaşúyambama, y bënga nÿets tempo celoca jtsiyenama tsëm cuerpo jtsebomnama cha chaomama;

³ chca, Cristo yochjésabo ora, bënga chë tsëm cuérpoca chamotsemnana, y ndoñe nÿe espíritu ndocna cuérpoca.

⁴ Bënga quem cuerpiñe, chë quem luarentşe vida jtsebomnama cuerpiñe chamojtsiyenëntscuana, yapa padecena soyënguiñe sufrina causa, bënga jabuache mochanjáshachna; chca echántsemna ndoñe nÿe chë espíritu ndocna cuérpoca jtsemnana bënga imojtsebóseyeca, ndayá masna, bënga chë tsëm cuerpo chamotsebomnama Bëngbe Bëtsá chaomama imojtsebóseyeca. Bënga fsëntseboşe chë bëngbeñe jopochócama yomna soye Bëngbe Bëtsá lempe chaotrocama, chca, bënga chamotsobenama celoca nÿetsca tescama vida jtsebomnama.

⁵ Y Bëngbe Bëtsá endmëna nda tojama bënga chamotseprontánama chë tsëm cuerpo jtsebom-

nama, y nda tojama Espiritu bəngbe ainaniñe cháuamashənguama, chca bəngbioye jinŷanŷiyama, bənga ndegombre mochjójyəngacñe ndayá Bəngbe Bətsá tojašebuachenacá.

⁶ Y chca, bənga sempre ainaniñe bəts añemo fchandbətsebomna. Bənga fsəndətatsəmo, quem cuerpiñe cabá vida bənga mochjəftsebomnəntscuana, bənga ndoñe mochántsemna Bəngbe Utabná yojtsemnentse.

⁷ Er mora bənga fsəndoyena jtsaməse, ntšamo Crístbeñe bənga imošbuachecá, y ndoñe nŷe ndayá jinŷama tmojtsobenama.

⁸ Bəngbe fsəntsemna ainaniñe bəts añémoca, y más fsəntseboše jájbanana quem cuerpiñe vida jtsebomnana, jama Bəngbe Utabnáftaca nŷetsca tescama vida jtsebomnana.

⁹ Chíyeca bənga bətsacá fsəndəntšena Bəngbe Utabná sempre oyejuayá jabemama, masque bənga quem luarentše quem cuérpoca tmojtsiyena, o ya ndoñe.

¹⁰ Er nŷetscanga šontsamna jashjanguana Crístbe puestoca tribunalentše, cada ona ntšamo yomerecencá chaóyəngacñama, ntšamo tšabá o ndoñe tšabá quem luarentše chabe cuerpiñe vida yojəftsebomnəntscuana tojəftsemcá.

Jábuayenama ntšamo Bəngbe Bətsá inama entšanga tempcá tšabá cháftaca chamotsatsmənama

¹¹ Chcasna, Bəngbe Utabná nŷetscangbiana chə más bətsá yomnama jtsejuabnayəse, bənga bətsacá fsəndama entšanga jáyənjanama, bənga tšabá fstsamama chamotsejuabnama. Pero Bəngbe Bətsá ya endətatsəmo ntšamo bənga

fstsēmēnā, y atše sēntsobátmana tšēngaftángnaca chca tšabá chašmotsetátšēmo, tšēngaftangbe ainanentša juabnēngaca, chē bēngbīama aīñe ca cmojtsētsētná juabnēnga.

12 Bēnga ndoñe cachiñe cabēngbīama queftsatoyebuambná; chca fsēntsichamo ndayá tšēngaftanga oyejuayēnga bēngbīama chašmotsemnā, chca, tšēngaftanga jojuama chašmobenā, chē uámana soyēnga tmojtsebiāmnángbioye ndayá entšanga canye entšábeñe tmojtsonyáca y ndoñe chca chē entšabe ainaniñe tomna soyēngaca.

13 Er bēnga mo chē ndoñe corente juabna nd-bomnēngcá fstsāmēse, ntšamo báseftanga mond-betsichamcá, jtsemnana Bēngbe Bētsá jaserviama; y bēnga corente juabna bomnēngcá fstsāmēse, jtsemnana tšēngaftangbe tšabīama.

14 Bēnga chca fsēndmēna, Cristo šondábabuanyēshanayeca, y chē soye endama bēnga nye cha fchaitseservēnā, er bēnga fsēndenojuabná y puerte tšabá fsēndētātšēmo, canya, Cristo, nyetscangbīama tojanóbanā; y cha nyetscangbīama tojanóbanayeca, endmēna mo cha tojanóbana ora, nyetscanga cháftaca cuařjobancá.

15 Y Cristo nyetscangbīama tojanóbana, chē quem luarentše vida bomnēnga ndoñe más nye cachēngbīama chamondētsiyenā, sinó chabīama, nda chēngbīama tojanóbana y tojtanayena.

16 Chiyeca, bēnga ya ndoñe ndocnabīama queftsatsjuabná ntšamo entšanga quem luarentše jtsejuabnayama monduamancá; masque ndegombre bēnga chca Cristbīama fsēnjanjuabná, mora ya

ndoñe chca chabiamama queftsatsjuabná.

17 Chcasna, nderado nda Crísoftaca cányiñe mo canyáca tojtsemna, Bëngbe Bëtsá tojama cha mo canye tsëm entšacá chaotsemnama. Ntšamo chë Crístbioye cabá nduabuátmana ora cha yojamncá, mora ya ndoñe quenátsmëna. Morna cha jtsejuabnayanana y jtsamana inye soyënga y tsëm soyënga.

18 Bëngbe Bëtsá endmëna nda chca inétsama, entšanga mo tsëm entšangcá jábiamama; y cha Crísoftaca tojama bënga tempcá tšabá cháftaca chamotsatsmënama. Y cha bënga canye trabajo šonjanabanýé, bënga entšanga jábuayenama, Bëngbe Bëtsá inétsama entšanga tempcá tšabá cháftaca chamotsatsmënama, y entšanga jujabuáchama chca chamotsemnama.

19 O mëntšá, Cristo tojanma sóyeca Bëngbe Bëtsá yojtsama entšanga chamotsobenama tempcá tšabá cháftaca jtsatsmënama, y chca, chënga chamotsobena chëngbe bacna soyëngama perdonánënga jtsemnama, y chë soyëngama nyetsca tescama castigánënga jtsemnama ndoñe chaondétsamnama. Y bënga šonjanabanýé chë trabajo, entšanga jtsabuayiynayama ntšamo Bëngbe Bëtsá inama entšanga tempcá tšabá cháftaca chamotsatsmënama.

20 Y chca, bënga jtsemnana Cristbe cuenta oyebuambnayënga y amënga, mo cach Bëngbe Bëtsá bëngaftaca cmojtsaimpadancá. Cristbe cuenta cbaimpadá, bëtscá šmochtsentšena Bëngbe Bëtsáftaca tempcá tšabá jtsatsmënama.

21 Cristo ndocna bacna soye tonjanma, pero bëngbe bacna soyënga jabuajuánamna, Bëngbe Bëtsá cháftaca tojanma mo cha canye

bacna soyënga amá cuaftsemncá, chca, bënga Crístoftaca cánÿiñe mo canÿacá jtsemnëse, Bëngbe Bëtsabe bominiñe tšábenga jtsemnama chamotsobenama.

6

¹ Chcáyeca, bënga Bëngbe Bëtsáftaca cánÿiñe trabájayënga quetsomñecana, cbontsaimpadana ndoñe nÿe bonamente chašmondóyëngacñe chë Bëngbe Bëtsá yojtsama soyënga, tšëngaftangbiana tšabe juabna jtsebomnëse.

² Er Bëngbe Bëtsá chabe uabemana palabrenguiñe mëntsá tojánayana:

Chë tšabe soye jamama tšabá šonjaninÿana ora,
atše tcbonjanoyeuná;

chë ábioye jatsbocama te, tcbonjanájabuache ca.

Smochjinÿe. Mora entsemna chë mocna ora Bëngbe Bëtsá tšabá ibojtsinÿana tšabe soye jamama; mora entsemna chë mocna ora Bëngbe Bëtsá yojtseboše aca jatsbocama.

³ Bënga ndocna bacna soye queftsátama, ndayá chaoma entšanga chë tšabe noticiënga chamotsábotema, chca, ndocná podesca chaondëtsóyebuambnama bëngbe trabajuama, Cristbiana.

⁴ Inÿetsá, bëngna nÿetsca soyënguiñe fsënjaniiyena mo Bëngbe Bëtsabe oservenëngcá; Bëngbe Bëtsábeñe obatmancá puerte uantadënga jtsemnëse, fstsuf-rina ora; puerte padecena soyënguiñe bëtsemna causa, ndayá jamama ndoñe fsëntsetatšëmbo ora; y ainaniñe puerte ngménaca fstsemna ora;

⁵ Inÿënga šojtsatsetšená ora; cárceloye šojautame ora; entšanga bëngbe contra tmojtsenbouénana

ora; jabuache trabájayañe puerte uamëntsnayënga fstsemna ora; bayté ntsamanacá fstsemna ora; y jasama tondaye fsëntsebmna ora.

6 Bëngnaca fsëntsinÿanÿná Bëngbe Bëtsabe oservénënga fstsmënana, puerte tšabe vídaca, ndocna bacna soye ntjamcá jtseyenëse; Bëngbe Bëtsabe soyëngama corente jtsetatšëmbëse; ínÿenga ntšamo šojáborlaye ora puerte uantadënga jtsemnëse; ínÿengbioye puerte bonshanánaca jtsënÿayëse; Uámana Espíritu bëngbe ainaniñe jtsebmna; y ndegombre nÿets ainánaca nÿetscanga jtsababuánÿeshanëse;

7 ntšamo Bëngbe Bëtsabiama ndegombre yomncá jtsabuayiyayëse; Bëngbe Bëtsabe obenánaca ba soyënga jtsamëse; y mo chë soldadëngcá, uayayënga jáyëñjanama y chëngbiama jenëuyanama soyënga jtsebmna, chë Satanásbioye jayëñjanama y chabiama jenëuyanama ndayá Bëngbe Bëtsá šojatšatacá jtsebmna; y Bëngbe Bëtsá chca tojama, er cha tojama bënga chabe bominyiñe tšábenga chamotsemnana.

8 Bënga fsëntsinÿanÿná Bëngbe Bëtsabe oservénënga fstsmënana, ínÿenga bëngbiama tšabe soyënga tmojtsejuabná ora y bënga nduámanënga jtsemnana chënga tmojtsama ora; ínÿenga tšabe soyënga bëngbiama tmojtsoyebuambná ora y chënga bëngbiama podësca tmojtsichamo ora; bënga áingñayënga fstsmëna ca báseftanga tmojtsejuabná ora, pero bënga ntšamo ndegombre yomncá jtsóyebuambnayëse.

9 Mo nduamanëngcá bënga entšángbeñe jtsënÿayana, pero banga corente tšabá bënga

šonděubuatma; bēngbiana sempre resjo endmēna jóbana, pero šmochjinýe, bēnga sempre vídaca chentšana jatóbocañana; bēnga juatsjínýama jobenayama, Bēngbe Bětsábeyeca castigánēnga fchandbétsemna, pero nýa jóbana ndoñe.

10 Masque ngménēnga fstsemna, ainaniñe sempre oyejuayēnga fchandbétsomñe; masque ndbomnjemēngcá, pero fchandbétsama banga Bēngbe Bětsábíocana bětscá chamotsebomnama; quem luarentša soyēnga tondaye queftsátsbomna, pero Bēngbe Bětsabe entšanga quetsomñecana, ndegombre lempe fsēndětsóbomñe.

11 Tšēngaftangbiana, Corintoca entšanga, lempe fsēnjayana, tondaye ntjaitēmćá; nýets ainánaca, corente cbondábabuanýeshana.

12 Bēnga puerte cbondábabuanýeshana, pero tšēngaftangna ndoñe yapa queščátababuanýeshana.

13 Atše cbontsaimpadana, mo canýe taitá chabe básēnga cuaftsaimpadancá, atše puerte chašmotsebobonshánama, er atše corente cbondábabuanýeshana.

Bēnga mondmēna mo Bēngbe Bětsabe běts yebncá

14 Crístbeñe ndošbuáchiyēngaftaca ndoñe šmatjenutaná ndayánaca jamama, er chca, chēngaftaca šmatjábocana mo chē jaárama uacnata ndoñe cachēnchechata tbontsemncá. Ndegombre, chē tšabe soyēnga amá y Bēngbe Bětsabe bominjíñe tšabia mēná, nýa tondayama cachcá ntsejuabnayana, chē Bēngbe Bětsá tojamandacá ndoñe tontsamacá y bacna soyēnga amacá. Ndegombre, chē entšangbe

juabna binÿnayáftaca vida bomná, nÿa tondaye ntsebomnana chë nÿe mo ibetiñcá juabnayáftaca.

¹⁵ Cristo y Satanás, Belial cánaca uabainá, ndocna te tondayama cachcá ntsejuabnayana; y cachcá copasana, Crístbeñe ošbuachiyá y chábeñe ndošbuachiyáftaca.

¹⁶ Ndocna soyiñe cachcá ntsemnana, Bëngbe Bëtsabe bëts yebna, chë nÿe canÿe Bëngbe Bëtsábioye jadórama yebna, y chë entsangbe pormana soyënga, mo diosënga cuaftsemncá jtsadoránana soyënga; chca endmëna, er bënga, nÿetscanga cánÿiñe Jesucrístbeñe ošbuachiyëngcá, mondmëna mo Bëngbe Bëtsá Ainabe bëts yebncá, ntšamo Bëngbe Bëtsá chabe uabemana palabrenguiñe chabe entsangbiamana tojanayancá: Chëngbeñe vida chántsebomna y chëngbenache chántšana;

atše chëngbe Bëtsá chántsemna y chëngna atšbe entsanga ca.

¹⁷ Chíyeca mëntsánaca Bëngbe Utabná chabe entsanga tojanëyana:

“Chë bacna soye amëngbentsana šmochjésebocana, y chëngbentsana šmochtsojuánañe;

tondaye šmattsebana, ni šmattsama ndayá Bëngbe Bëtsabe entsangbiamana ndoñe tšabá tontsemncá.

As cbochanjúbuaja,

¹⁸ y chántsemna mo canÿe taitacá tšëngaftangbiamana, y tšëngaftangna mo atšbe uaquiñënga y bembangcá.

Chca séntsichamo atše, tšëngaftangbe Utabná, nÿets obenana bomná ca” —chiñe enduábemana.

7

¹ Chcasna, atšbe bonshánënga, chca endmëna ntšamo Bëngbe Bëtsá šojašebuachenacá. Chíyeca šontsamna, Bëngbe Bëtsabe delante nyetsca soyënguiñe tšábenga jtsemnana, bëngbe cuerpama o espíritbiana bacna soye ndoñe más ntsamcá; y Bëngbe Bëtsá nyetscangbiana más uamaná yomna ca mondëjuabnýyeca, lempe ntšamo tmojobenacá mochtsiyena mo chabe entšangcá, nyetsca soyënguiñe puerte tšábenga jtsemnëse.

Ntšamo chë Corintoca entšanga juabna tmo-jantrocá

² Bëngbiana šmochtsenójuabnaye tšëngaftangbe ainaniñe puerte bonshanánaca. Bënga ndocnabiama bacna soye chibiatsma, ndocnabiama chibiatsma más bacna entšá chaotsemnana, y ndocnábioye chibiatsingñé.

³ Atše chca ndoñe quetsátichamo, ndoñe tšabá šmonjama ca tšëngaftangbiana jayanama, er ntšamo ya tcbonjauyancá, atše tšëngaftangbiana sempre ainaniñe puerte bonshanánaca sëndbétsenojuabnaye; y chca, mo átšeftaca canyiñcá šmochántsemna, masque chayóbana o cabá vida chaitsóbomñëse.

⁴ Atše puerte tšabá sëndétatšëmbo, ntšamo tšabá yomncá šmochtsamama; y tšëngaftangbiana puerte oyejuayá sëntsemna. Lempe ntšamo tsësufrincá tsiyenama, atšbe ainaniñe bëts añemo sëndëtsóbomñe y corente sëntsoyejuá.

⁵ Macedonia luaroye fsënjánashjajna orscana, ndoñe luare queftsátsbomna jóchnama, sinó nyetsca soyënguiñe fsëndëpadecena: chë bëngbe buayenana

soyama contra tmojtsemnëngaftaca jabuachana enatsëtsnayëse, y bëngbe ainaniñe jtsauatjëse.

6 Pero Bëngbe Bëtsá, chë yapa añemo ndbomnëngbioye endbetsañemuayá, tojanma bënga ainaniñe más añemo fchaitsebomnama, Tito moye tonjánashjango ora.

7 Y cha tonjánabo ora, bënga ndoñe más añemo quefstétsebomna nÿe cha tojánashjanguama, sinó tšëngaftanga šmojanájabuachama y ainaniñe añemo chaotsebomnama šmojanmama. Cha šonjanëyana tšëngaftanga tša šmojánboše bënga jányama ca, y šonjanacuntá ntšamo tšëngaftanga ngménaca šmojamna, atšbiana ndoñe tšabá šmonjanma causa, y ntšamo tšëngaftangbiana atšbe tšabiana puerte iuámanana; y quem chabe noticiëngaca, cabá más sëntsoyejuá.

8 Er masque tšëngaftanga tša ngménaca šmojamna chë tchbonjanëbuábiana tsbuanáchama, mora ndoñe quetsatsjuabná más tšabá yojamna chca ndoñe jatëbuabiamana ca; masque tempo atše chca sënjanjuabná, er atše sëntsetatšëmbo chë tsbuanácha básefta tescama ngménënga tcmojánabiana,

9 mora atše puerte oyejuayá sëntsemna, ndoñe tšëngaftanga ngménënga šmojamnama, ndayá chë šmojánbomna ngménana tojanmama tšëngaftanga chašmuenójuaboma ndoñe tšabá šmontsamama, y chca amana chašmotsajbanama, tšëngaftangbe juabnënga jatrócase. Chca enjamna, er tšëngaftanga ngménana šmojánbomna ntšamo Bëngbe Bëtsá inabošcá; chíyeca, bënga ndocna bacna soye tšëngaftangbiana chibiatsma.

10 Ntšamo Bëngbe Bëtsá tojtsebošcá ngménana bomnentsana, jóbocnana chë bacna soyënga tcojamama jenójuaboyana y juabnënga jatrócana; y juabna jatrócana entsábioye juanatsana atsbocaná chaotsemnana, y cha ndocna te ntjátsjuabnayana más tšabá yojamna ndoñe chca ntjatstrócana ca. Pero ntšamo chë nÿe quem luarama enójuabnaye entsanga mondbetsebomncá ngménana bomnentsana, ndoñe ntjóbcnana juabna jatrócana; chentsana jóbocnana nÿe nÿetsca tescama castiganá jtsemnana, mo nÿetsca tescama cuafjobancá.

11 Smochjinÿe ndayá tojóbcna, ntšamo Bëngbe Bëtsá inabošcá ngménana bomnentsana: tojanma chë šmojanma soyiñe puerte chašmuenójuaboma; y ntšamo jájandmanana bëtscá chašmonguanguama; tojanma tšëngaftanga chacmetonama chë bacna soye tojanmáftaca; y castigánënga jtsemnana jtsauatjámna. Chentsana, tšëngaftanga tša šmojtsanboše atše jinÿama; y šmojtsanprontana lempe jamama chca bacna soye ndoñe más chaondëtsemnana y chca tojanmábioye jacastígama. Nÿetsca chë soyënguiñe tšëngaftanga šmonjinÿanÿé chca bacna soye ndoñe šmonjanmama; y chca, mora tondaye quenátsmëna tšëngaftanga castigo jtsebomnana chacmotsamnana.

12 Y chca, atše chë tsbuanácha tcbonjanëbuábiamama ora, ndoñe checbátanëbuabiamama chë puerte bacna soye tojanmábeyeca, ni chë bacna soye tojanoyëngacñábeyeca; ndayá tšëngaftanga, mo Bëngbe Bëtsabe delante cuaftsemnëngcá, chë šmojanma soyiñe bëtscá chašmuenójuaboma,

y chca, cha chašminÿanÿé tšëngaftanga bëngbe tšabiana puerte šmenójuabnama.

13 Chíyeca bënga más añemo ainaniñe fsëntsebomna.

Pero ntsachetšá añemo fstsbornama, masna puerte oyejuayënga fsëntsemna, er bënga fsënjinye Tito tša oyejuayá, er chabe ainaniñe lempe natjëmbana yojtsemna nÿetsca tšëngaftangbiana.

14 Tito tšëngaftanga jányama cabá nda ora, atše cha sënjaniana tšëngaftanga šmochjanóyeunaye chë atše tcbonjanëbuaja palabra ca; y tšëngaftanga ndoñe chešmatsma atše chaitsëuatjama chca tijánayanama. Inÿetšá, lempe ntšamo tcbøjauyancá ndegombre endmëna; cachcá, ntšamo bënga Títbioye fsënjaniyancá ndegombre entsemna, chë tšëngaftangbiana fstsóyejuama.

15 Y mora Tito más cmontsababuánÿeshana, ntšamo cha tcmojanamëndacá ndayá tšëngaftanga šmojanmama, y ntšamo puerte respétoca y mo uamaná cuaftsemncá chabiana jtsejuabnayëse šmojanofjama tojtenojuabó ora.

16 Atše puerte oyejuayá sëntsemna, er atše sëndëtatšëmbo tšëngaftanga ntšamo tšabá yomncá nÿetsca soyënguine šmochtsamama.

8

Chënga jañëmuayama, inÿe osbuachiyëngbioye nÿets ainánaca jujabuáchama

1 Y mora, Jesucristbeyeca catsátanga, bënga fsëntseboše tšëngaftanga chašmotsetátšëmbo ntšamo Bëngbe Bëtsá bëtscá tšabe bendicionënga

tojama Macedonia luarentše ošbuachiyëngcá enefjuanëngbiamá.

² Chënga puerte tmojasufrí, y chora chca, chënga tmojinÿanyé becá imošbuáchema y tša imoyejuama; y masque puerte ndbomnjémënga, chënga nyets ainánaca bëtscá tmojanacaredadó Jerusale-
nentša ošbuáchiyënga ndbomnjémëngbiamá.

³ Atše sëndétatšëmbo y sentsobena jayanama chënga ndegombre tmojatšatá ntšamo tmojobe-
nacá, y ntsachetšá imobenentsana cabá más, chënga chca imobóseyeca.

⁴ Tša šonjánaimpadana chëngbioye jálesenciamá ndayánaca jamama, Jerusalenoca ošbuachiyëngbioye jujabuáchama.

⁵ Bënga ftsjanobatmanama cabá más chënga tmonjanma; natsana, chënga Bëngbe Utabná tmo-
janiyana lempe ntšamo cha tojtsebošcá chënga ja-
mama imojtseboše ca, y chentšana bëngaftácnaca cachcá tmonjanma; y lempe enjamna ntšamo Bëngbe Bëtsá inabošcá.

⁶ Ndayá Macedonioca ošbuáchiyënga tmojanmama bënga añemo fsënjanóyëngacñeyeca, bënga Tito fsënjaimpadá chë tšabe trabajo chaopochocama, chë tšëngaftangbeñe crocénana játbanana, Jerusalenoca ošbuáchiyënga jujabuáchama, ndayá cha jamama tojanbojatšecá.

⁷ Y morna, ntšamo tšëngaftanga nyetsca soyënguñe tša šmomncá —puerte ošbuáchiyënga, becá obenënga Bëngbe Bëtsabe soyëngama jóyebuambayama, puerte osertánënga Bëngbe Bëtsabe soyëngama, corente juabnayënga bëtscá jamama Cristo jasérviamá y bëngbioye corente

ababuányeshanënga —cachcá, mórnaça bëtscá šmochjama quem trabajuiñe chë ošbuáchiyënga ndbomnějémëngbiama, tšëngaftangbe bonshánana jtsinýanýnayëse.

⁸ Chca ndoñe quecbatëtšëtsná mo canýe mandcá; atše sëntseboše ndayá nýe tšëngaftanga jáuyanana ntšamo ínýenga bëtscá tmojatrabajá chë ndbomnějémëngbiama, tšëngaftangnaca cachcá chašmotsamama; y chca, chašminýanýema chë tšëngaftanga šmobomna bonshánana ndegombre bëtsemnana.

⁹ Er tšëngaftanga šmondëtatšëmbo ntšamo Bëngbe Utabná Jesucristo puerte tšabe soyënga bëngbiama tojamama, bëngbioye puerte jtsababuányeshanëse. Celoca, cha cabá quem luaroye ndabo ora, cha bëtscá inabomna; pero tšëngaftanga ababuányeshanayeca, mo canýe puerte nduamanacá tojanóbema. Y mora, Cristo mo canýe nduamanacá tojóbmeyeca, Bëngbe Bëtšá puerte tšabe soyënga šojatšatá.

¹⁰ Tšëngaftangbe tšabiama mëntšá cbabuayená, ntšamo quem soyiñe šmochjamama. Chë inýe uata tšëngaftanga šmonjanbojatšé, ndoñe nýe chë ndbomnějémëngbiama jacjayama, ndayá chca jamama jtsebošámna.

¹¹ Morna, chë ndbomnějémëngbiama trabajo šmochjapochóca; chca, ntšamo tšëngaftanga becá šmonjanprontana y jujabuáchama tša šmonjanbošcá, mórnaça cachcá chašmomama chë trabajo japochócama, ntšamo šmojobenacá jacjayëse.

¹² Er canýe entšá, jatštayama ndegombre tojtsebošëse, ndayá cha tojatštacá Bëngbe Bëtšábioye

oyejuayá jabemana, ntšamo cha tojtsobencá, y ndoñe ntšamo cha ndoñe tontsobencá.

¹³ Ndoñe quenátsmëna, tšëngaftanga puerte ujabótënga chašmoquedá, ínÿengbioye atšatnaye causa, chënga ndoñe yapa ujabótënga chamondëtsemnama.

¹⁴ Atše séntsichamo ndayá nÿetscanga chamotsenajabuachana, chca tojtsëjaboto ora ca. Mora, chë bëtscá šmobomnentšana šmontsobena chënga jujabuáchana, ndayá tojtsabuáshebencá jatšatayëse; y inÿe orna, chënga entsamna tšëngaftanga jujabuáchana chë cmojtsabuáshebena soyëngaca. Chca, nÿetscanga jóyëngacñana ndayá tojtsëjaboto ora.

¹⁵ Ntšamo Bëngbe Bëtsabe uabemana palabrenguiñe endayancá:
Chë tša bomnábioye ndoñe chebatanójama;
y chë nÿe batsá bomnábioye, ndoñe quebënjatanbuáshbena ca.

Tito y chabe enutënga

¹⁶ Bëngbe Bëtsá šcuatschuá, tšëngaftanga jtsanÿenama Tito ainaniñe juabnënga chaotsebomnama cha tojanmama, cachcá ntšamo bënga fsëndbomncá.

¹⁷ Er tšëngaftangbioye chaotsama bënga fsënjanimpadá ora, cha oyejuayá aíñe ca tonjánayana choye jama; y chabiamana puerte enduámana tšëngaftangbe tšabiana; chíyeca mora echanjá tšëngaftanga jánÿama, chca jamama cachá yobóseyeca.

¹⁸ Títóftaca, canÿa Jesucrístbeyeca bëngbe catšata fsëntsichamná; chabiamana puerte

tšabá ošbuachiyëngcá enefjuanëngbenache mondoyebuambná, chabe trabajuama chë tšabe noticiënga abuaiynayama.

¹⁹ Y ndoñe nÿe chë soye, sinó quem luar-entše ošbuachiyëngcá enefjuanënga cha tmon-juábuayana bëngaftaca Jerusalenoye jama, y jujabuáchama chë ndbomnjëmëngbiana trabajuiñe; chë trabajo endmëna bonshánana jinÿanÿiyama; chca fsëntsama, Bëngbe Utabná jtsatschuanayama y jinÿanÿiyama bënga chca jujabuáchama tša fsts-bošama.

²⁰ Títoftaca cha fsëntsichamná, chca, ndocná chaondëtsichamo bënga ndoñe tšabá tifjama ca, ntšamo játbanama cmojtsamniñe, chë becá juabónana játbanama, ndbomnjëmënga jujabuáchama;

²¹ er bënga fsëndama lempe ntšamo fstsobencá, ndoñe nÿe ntšamo Bëngbe Bëtsabe bominiñe tšabá yomncá jamama, ndayá ntšamo entsangbe bominiñe tšabá yomncánaca.

²² Chátaftaca inÿa Jesucrístbeyeca bëngbe catšátnaca fsëntsichamná; cha bënga ba soyiñe šonjinÿanÿé cha yojtseboše bëtscá jamama, Cristo jasérviana, y mora más, er cha puerte bëtscá entsejuabná tšëngaftanga puerte tšabá šmochjamama.

²³ Y Titbiamna, cha quem trabajuiñe atšbe enutá endmëna, y atšcá tšëngaftangbiana endëtrabája; y chë inÿata Jesucrístbeyeca bëngbe catšatatbiamna, chata bontsemna quemuentša ošbuachiyëngcá enefjuanëngbe ichmónata, chëngbiana chabóyebuambama; y chë bontsama sóyecna, chata Crístbioye corente

jtsatschuanayana.

²⁴ Chíyeca, chëngbioca ošbuachiyëngcá enefjuanënga chca chamotsetatšëmbuama, chë ichmona boyabásengbioye šmochjínýanýiye tšëngaftanga ndegombre chënga šmojtsababuánýeshanama, y bënga razón fstsebonnama tšëngaftangbiana oyejuayënga jtsemnama.

9

Chë inýe ošbuáchiyëngbiana crocénana játbanama

¹ Chë Jerusalenoca Bëngbe Bëtsabe entsangbiana crocénana játbanamna ndoñe quenátsiyta tšëngaftangbioye jatëbuabiamnayama,

² er atše ndegombre sëntsetatšëmbo tšëngaftanga tša šmojtseboše chca jujabuáchama. Macedonioca entsanga puerte oyejuayá sempre sëndbétsëtsnaye, Acaya luaroquënga chë inýe uatscana quem trabajuiñe jujabuáchama šmoprontánama; y chë jujabuáchama tšëngaftangbe bëtscá juabnënga tmojama banga quem luarentšënga bëtscá añemo chamotsebonnama, chëngnaca chë trabajo jamama.

³ Pero Jesucrístbeyeca quem catšátanga sentsichamná, ntšamo bënga oyejuayënga tifjayancá tšëngaftanga chašmotsamama, chë tšëngaftanga quem trabajuiñe bëtscá šmochjama ca; chca, ntšamo tijanayancá ndoñe nýe bonamente chaondëtsemnama, y ntšamo sënjanayancá tšëngaftanga chašmotseprontánama;

⁴ er nderado báseftanga Macedonioquënga átseftaca tmojá y choca ndëprontánënga

tcmojánÿena chë ndbomnjémëngbiamama
ujabuáchenanaca, chë soye nanjama bënga
fchaitseuatjama, er ba soye fsënjayana
bënga ndegombre fstsëtátšëmbo tšëngaftanga
prontánënga šmochtsemna ca; y ndegombre,
tšëngaftangbiamama cabá más ouatjácá nántsemna.

⁵ Chíyeca, tšabá šonjuínÿnana Jesucrístbeyeca
quem catšátanga jáimpadana chënga atšbe
natsana chamotsama tšëngaftanga jánjama,
y chacmëjabuachama chë juabónana
játbanama, ndayá tšëngaftanga tempo
šmonjanašebuachenacá. Chca, atše choca
chajjášhango ora, tšëngaftangbe juabónana
chaotseprontana. Chca, tšëngaftanga
šmochanjínÿanyíe ndbomnjémëngbiamama
šmojacjácá, chca jamama tša šmobóseyeca, y ndoñe
nyë batšatema jatšatayama y tšëngaftangbiamama
bëtscá jobuájuama šmojtseboše.

⁶ Quemuiñe šmochtsenójuabnaye: Nda nyë batšá
tojajé, cach batšá chentsana josháchiñana; y nda
bëtscá tojajé, cach bëtscá chentsana josháchiñana.

⁷ Cada ona bontsemna jajájuana ntšamo chabe
ainaniñe tojajuabocá; ndoñe ngmënaca o nyë
ínÿenga chca jamama tmojtsemándayeca. Chca
chaotsemna, er nda oyejuayá tojajajóbioye, Bëngbe
Bëtšá jtsebobonshánana.

⁸ Bëngbe Bëtšá endobena jamana chábentšana
nyëtsca tšabe bendicionënga y bëtscá soyënga
tšëngaftanga chašmotsebomnama; chca,
ntšamo nyëtsca soyënguiñe cmojtsëjabotcá
sempre chašmotsóbomñana, y cabá más bëtscá
chašmotsebomnama, nyëtsca tšabe obrënguiñe

ínÿenga chašmējabuachama.

⁹ Bēngbe Bētsabe uabemana palabrēnguiñe, mēntšá endayana chē bētsá tojacjabama:

Cha nÿets ainánaca ndbomnjémēnga bētsá jatšatayana;

y chē tšabe soyēnga ntšamo cha tojtsamcá nÿets tempo jēftsemnana.

¹⁰ Bēngbe Bētsá, nda endbama chaotsemna jénaye jájema y sananga jasama, cmochanjátšataye lempe ntšamo cmojtsējabotcá, y echanjama, tšēngaftanga cabá más tšabe soyēnga chašmotsamama.

¹¹ Bēngbe Bētsá echanjama tšēngaftanga nÿetsca tšabe soyēnga chašmotsebomnama, chca, tšēngaftanga nÿets ainánaca puerte ínÿengbioye chašmatšatama, y bēngbeyeca, chē mochjójēngacñēnga Bēngbe Bētsá chamotsatschuanama;

¹² er chē ujabuáchenana Bēngbe Bētsabe entšanga tcojatsatá ora, ndoñe nÿe ndayá tojtsējabotcá jatšatayana, ndayá chēnga Bēngbe Bētsá chamotsatschuanámna jamana.

¹³ Chēnga Bēngbe Bētsá mochántatschuanaye, er chē ujabuáchenanaca chēngbioye jinÿanÿiyana, ntšamo Cristbe tšabe noticiēnguiñe iuayancá tšēngaftanga šmoberdecénama, y ntšamo tšēngaftanga tšabá jamēse, nÿets ainánaca bētsá soyēnga chēnga y nÿetscanga šmojátšatama.

¹⁴ Y chēnga tša mochántseboše tšēngaftanga jányama y tšēngaftangbiana Bēngbe Bētsá mochántseimpadana, er cha bētsá tšabe soyēnga tšēngaftangbiana tojama.

¹⁵ ¡Bēngbe Bētsá šcuatschuá ndayá cha

šojátšatama, canÿe puerte uámana soye, ndocná jobenayana tšabá jayanama ntšamo chë soye bétsemnana!

10

Ntšamo Pablo tojánayana ínÿenga chabe contra imojtsichamo ora

¹ Y mora, atše Pablo, cbochanjáimpada, tšëngaftangbioye puerte bonshanánaca jtsénÿayëse, y tšëngaftangbiamama tšabá jamama jtseprontánëse, ntšamo cach Cristo endbetsamcá. Báseftanga tšëngaftangbioquënga imojtsichamo atše puerte nduamaná tsnenóbema atše tšëngaftangaftaca stsemna ora, pero corente añemo bomná tsnenóbema jabuache soyënga jayanama tšëngaftangbentšana bënoca stsemna ora ca.

² Tšëngaftanga cbontsaimpadana, tšëngaftanga jányama chaijá ora, atše ndoñe chašondëtsemna puerte añemo bomná jtsemnana, jabuache soyënga tšëngaftanga jáuyanama, ndoñe ntšamo atše puerte tšabá sëntsetatšëmbcá ndayá báseftangaftaca jamama šojtsotocana, chë ndëmuanyënga imojtsejuabná, nÿe bënga tšabá jtsomñama juabnëngaca bënga fstsiyena ca.

³ Ndegombre bënga quem luarentše fsëndoyena, pero ndoñe queftsátspelia Cristbiamama, ntšamo quem luarentša entšanga monduamancá;

⁴ er chë ndaye sóyeca bënga Cristbe soyëngama fsëndépélia, ndoñe quenátsmëna mo chë ndaye sóyeca chë nÿe quem luarama enójuabnaye entšanga japéliamama monduamancá, ntšamo nÿe chënga tšabá jtsomñama juabnënga yomncá.

Inyetsá, chë ndaye soyëngaca bënga fsëndépéla, Bëngbe Bëtsá jtsinyanana puerte obenana bomna soyënga yomna ca; y endmëna chë Satanás tojtsemánda soyënga jayëñjanama, puerte jabuache soyënga jayëñjanama. Mo nda canye uayayábioye jtsepochoacá, chë Bëngbe Bëtsabe osertánana ndoñe yonduámana ca jinyan'yiyama soyënga ichámëngbiana,

⁵ y Bëngbe Bëtsabe osertánana jtsabotema juabnënga bomnëngbiana, bënga fsëndama ntšamo chënga tmojtsichamcá tondaye chaondëtsámanama. Y chë japéliama fsëndbomna soyëngaca, bënga fsëndbétsama chca juabnayana chamotsajbanama, y chamotsobena ntšamo Cristo yomandacá jtsamana.

⁶ Bënga fsëntseprontana chë Cristbiana ndu-auenanënga jácastigama, lempe ntšamo Cristo cmotšamëndacá tšëngaftanga chašmojtsama ora.

⁷ Tšëngaftanga ndayánaca jtsonyayana nye ntšamo tbojtsabinëncá. Nderado nda becá tojtsejuabná Cristbia yomna ca, cha bontsemna jtsejuabnayana bëgnaca Crísbenga fstsmënama, ntšamo cha yomncá.

⁸ Er atše masque tša sëndbétsoyebuambnaye chë Bëngbe Utabná šojatšatá mandama, chë ndáyeca bënga jamama tšëngaftanga puerte chašmotsošbuáchema y ainaniñe bëts añemo chašmotsebomnama, y ndoñe tšëngaftanga ntjapochócama, chama atše ndoñe quetsátéuatja.

⁹ Atše ndoñe quetsátsboše tšëngaftanga chacmotsin'yana, tšëngaftanga jaútatjayama atše stseboše ca, ndayá atšbe tsbuanáchangañe tijuábemama.

10 Er báseftanga mēntśá atšbiamá imojtsichamo: “Chabe tsbuanáchangañe cha šontsamēnda bētská soyēnga jamama, y tša obenacá cha jtsóyebuambnayana; pero cha bēngaftaca tojtsemna ora, cha jtsóyebuambnayana mo canye ndocna obenana ndbomnacá, y ntšamo tojtsichamcá tondaye ntsámanana ca.”

11 Chca entšanga entsamna jtsetatšēmbuana, ntšamo bēnga fstsichamcá, tsbuanachangá juíchmuase, tšēngaftangaftaca cabá ndoñe fsēntsemna ora, tšēngaftangaftaca fchaitsemna órnaca, bēnga chca fchjamama.

12 Ndegombre bēnga ndoñe tša añemo queftsátsbomna jayanama nyētśá uámanēnga fstsmēna ca, mo chē cachēnga jtsenábotamnayana uamanēngcá. Chēnga jtsejuabnayana y jtsichámuana tšábenga imomna ca, nye ntšamo cachēngbeñe ínýenga imomnama jtsonýayēse; y chca tmojtsama ora, chēnga juabna ndbomnēnga jtsemnana.

13 Bēnga ndoñe yapa quifchatóyebuambaye cabēngbiamá, chca, tša tšábenga bēnga imomna ca jtsenábotamnayama; fchanjóyebuambaye ndayá chē bēnga tifjama tšabe trabajuama, ndayá Bēngbe Bētsá šojabanýecá, y chíñnaca entsemna ntšamo tšēngaftangbeñe Corintoca tifjamcá.

14 Chíyeca, bēnga ndoñe queftsatoyebuambná chē bēnga ndoñe derecho fsēntsebomnama, ntšamo ndegombre nántsemna bēnga tempo tšēngaftangaftaca ndoñe mafsēnjamnēse; er bēnga chē natsanēnga fsēnjamna tšēngaftangbioye jama, Cristbiamá tšabe noticiēnga jábuayenama.

15 Y ndoñe quifchatóyebuambaye tša tšabá bēngbe trabajo yomna ca, chē ndayama ndoñe šontsamna chca jatichámuana, chē trabajo ndoñe bēngbe soye, sinó ínŷengbe soye yómnayeca. Chamna, bēnga fsēntsobátmana tšēngaftanga Crístbeñe más chašmotsošbuáchema, y chca chaojtsemna ora, bēnga fchayobená ba luariñe entšanga jábuayenana, ntšamo tšēngaftangbeñe fsēntsamcá.

16 Chca, fsēntsobátmana bēnga jobenayama tšabe noticiēngama jábuayenama, chē tšēngaftangbentšana más chcoye imoyena entšángbioye; chca, bēnga ndoñe yapa quifchatóyebuambaye ínŷengbe trabajuama, Crístbe soyēnga jábuayenama, mo chē soye bēngbe trabajo cuafjatsmēncá.

17 Ntšamo Bēngbe Bētsabe uabemana palabrēnguiñe endayancá: “Nda tojtseboše jayanama cha canŷe uámana entšá yomna ca, más tšabá cha cháuyana Bēngbe Utabná puerta uamaná endmēna ca.”

18 Er Bēngbe Bētsá jayanana canŷe entšá ndegombre tšabá tojama ca, ndoñe nŷe cachá tojtšenábotamnabiama, ndayá Bēngbe Bētsá chca ndegombre tojama ca Bēngbe Bētsá tojtsejuabnabiama.

11

Pablo y chē ndoñe ndegombre ichmónēnga

1 Malaye atše šmēntjēuánta, atše básefta soyēnga mo canŷe opá tojtsoyebuambnacá stsichámēntscuana, cach atše stsenabotamná ora. Masque ntšámncá šmochtsēuánta.

2 Bēngbe Bētsábeyeca atše tša cbondábabuanŷeshana y cbondánŷena, tšēngaftanga

n̄ye cha chašmotsěstonama y ndoñe ín̄yengbioye. Er atše Cristo s̄enjašbuachená tš̄engaftanga sempre cha šmochtsěstonama, y s̄entseboše, cha quem luaroye yochjésabo ora, chábioye tš̄engaftanga júshejanguana, mo n̄ye chábioye siempre ustoněngcá, ntšamo can̄ye taitá chabe bembe ndocna boyabása nduabuatomá n̄ye can̄ye boyabásaftaca chaóbuamama jushjanguancá.

³ Mětšcuaye Evábioye tbojaningñé, y cha tbojanín̄ynana puerte osertanabe soyēnga cuaftsatsětsnacá, pero ndegombre ndoñe chca yonjamna. Atše s̄entsauatja nderado cachcá ín̄yenga tš̄engaftangaftaca muanjama y tš̄engaftangbe juabna chašmotrocá, y chca, tš̄engaftanga chašmotsajbaná siempre jtsejuabnayana n̄ye Cristo n̄yetsca soyēnguiñe jtseeservénama.

⁴ Atše chama s̄entsauatja, er ndánaca jashjanguana y Jesusbiana tojtsabuayiyná, mo cha in̄ye entšá cuaftsemncá, ndoñe ntšamo bēnga Jesusbiana fs̄endabuayiynacá, y tojtsama tš̄engaftanga chašmobená can̄ye esp̄iritu jtsebomnana, pero ndoñe ntšamo chē Bēngbe Bētsá tojama tš̄engaftangbe ainaniñe cháumashēnguama esp̄iritcá, chē Uámana Esp̄iritu, tš̄engaftanga tšabá cha jtsēuántana. Y atše s̄entsauatja, tš̄engaftangbe ainaniñe in̄ye buayenana chašmóyēngacñama ndánaca tojtsamama, ndoñe cachcá chē tšabe noticiēnga ntšamo ya bēngbentšana šmonjouencá, y chora tš̄engaftanga chábioye becá tšabá jtsēuántana.

⁵ Pero atše s̄entsejuabná tondayiñe más batšá uamaná tsmēna ca, chē Jesucristbe puerte uámana

ichmónënga imomna ca juabnayëngbiana.

⁶ Atše ndoñe sënjuatsjinÿe ntšamo corente tšabá entšángaftaca jóyebuambayama; pero atše puerte tšabá sëndétatšëmbo ntšamo stsichámuama. Bënga puerte tšabá nÿetsca soyënguiñe tšëngaftanga tcbonjanÿanÿé, ndegombre chca osertánana ftsbomnana.

⁷ ¿O atše ndoñe tšabá sënjama, tšabe noticiënga cbonjanabuayiyná ora, tšëngaftangbentsana atšbiana tondaye ntjotjañcá, nduamanacá jenóbemëse; chca, tšëngaftanga puerte uámanënga chašmotsemnama Bëngbe Bëtsá chaomama?

⁸ Mo ínÿenache ošbuachiyëngcá ene-fjuanënga crocénana cuafjabaquécá, crocénana sënjanóyëngacñe chë ošbuachiyëngbentsana, tšëngaftanga jujabuáchama jobenayama.

⁹ Y tšëngaftangaftaca sënjamna ora y ndayánaca šojanájaboto ora, atše ndoñe checbátantjañe atšbe opresidama, chca, tšëngaftangbiana totcá ndoñe chaondëtsemnama; er chë Jesucristbeyeca catšátanga Macedoniocana tmonjánashjajnënga, šmonjanatšetá ntšamo šojanbuashbencá. Chca, atše sënjanma, atšbe causa tšëngaftangbiana totcá ndoñe chaondëtsemnama; y sempre chca chántsama.

¹⁰ Serto, Cristbe ndegombre soyënga atšbe ainaniñe sëntsebomna; chíyeca, atše corente sëntsetatšëmbo ndocná Acaya luarentše yochjama atše chayajbaná puerte oyejuayá jtsóyebuambnayama, chë tšabe noticiënga stsabuayiyná ora; y chca chanjama atšbe opresidama chašmoyema ínÿenga ntsamncá.

¹¹ ¿Y ndáyeca chca stsama? ¿Yojtsemna ndoñe

cbondábabuanÿeshana causa? Ndoñe. Bëngbe Bëtsá endétatšëmbo tša cbondábabuanÿeshanama.

¹² Pero atše sempre chántsama ntšamo sëndamcá, chca, chë ínÿenga, chë Jesucristbe puerte uámana ichmónënga imomna ca juabnayënga ndoñe chamondétsebomna ndáyeca jatenábotamnayama, ntšamo bënga fstsamcá chënga imojtsetrabája ca.

¹³ Er chënga ndoñe quemátsmëna Jesucristbe ndegombre ichmónënga, mondmëna chë ínÿenga jáingñama imotrabájanga, y mondama entsanga chaotsinÿanama chënga mo Jesucristbe ndegombre ichmónënga cuaftsemncá.

¹⁴ Y chama ndoñe šmatjenjnaná, er cach Satanásnaca endbëtsama mo canÿe buashinÿinÿana angelcá jtsinÿanama;

¹⁵ chíyeca, ndoñe muatjenjnaná, chabe oservenëngnaca tmojtsamama mo tšabe entsangcá jtsinÿanama. Pero chënga mochanjopochóca, ntšamo tmojtsomerecencá, ndayá tmojamama.

Ntšamo Pablo tojansufrí, Cristbe ichmoná bétsemna causa

¹⁶ Cachiñe cbochtëtëyana: ndocná chaondétsejuabná atše opá stsemna ca, cach atše stsenabotamná ora; pero chca šmojtsejuabnase, mo canÿe opabioycá šmochtsëuáanta, chca, átsnaca jtsenábotamnayama jobenayama.

¹⁷ Chca jayanëse, ndoñe quenátsmëna ntšamo Bëngbe Utabná endbetsamcá, ndayá canÿe opá inetsamcá; atše tšabá jtsetatšëmbëse ndegombre stsebomna ndáyeca jobenayama jtsenábotamnayana.

18 Banga mondmëna, cachënga jtsenábotamnayana ndayá quem luarentse chënga tmojamama, as átšnaca chantsenábotamnaye.

19 Tšëngaftanga chë tša osertánënga, oyejuayënga opëngbioye jtsëuantánana.

20 Atše sëndëtatšëmbo tšëngaftanga chë opëngbioye šmnetsëuantánama, er tšëngaftanga šmondbëtsëuantana chë nÿets tempo tšëngaftanga mo chëngbe oservenëngcá tcmojtsamëndayënga, o chë tšëngaftanga bëtscá tcmojtsabacanga, o tcmojtsaíngñanga, o chë uámanënga tmojtšenobiamnanga tšëngaftanga mo nduamanëngcá jtsamëndayama, o chë tcmojtsajuebjantšetayënga.

21 Atše chca sentsichamo masque sentsëuatja chca jayanama. Bënga fsënjamna corente obenana ndbomnënga, ntšamo tšëngaftanga bëngbiamna šmojayancá, tšëngaftangaftaca chca jamama.

Inyënga, chë tšëngaftangbeñe imotrabájanga, ndayama jtsenábotamnayama tmojtsebomnëse, puerte uámana ichmónënga imomna ca jtsichámëse, átšnaca añemo sëntsebomna chama jtsenábotamnayama; chca stjayana ora, mo canÿe opá tojtsoyebuambnacá sëntsoyebuambná.

22 Chënga jtsenábotamnayana hebreunga imomnama. Atšnaca hebreo sëndmëna. Chënga jtsenábotamnayana Israeloquënga imomnama. Atšnaca Israelocá sëndmëna. Chënga jtsenábotamnayana Abrahábentšana entšanga imomnama. Atšnaca Abrahábentšana entšá sëndmëna.

23 Chënga jtsichámuana Cristo imoservena ca. Atše chëngbiamna cabá más tšabe oservená sëndmëna. Chca stjayana ora, mo canÿe opá

tojtsoyebuambnacá sëntsoyebuambná. Atše chëngbiana más tijatrabajá, más šmojutame, más šmojatsetšená y ba soye atšbiana resjo endmëna jóbanama.

24 Shachna soye judiënga šmonjantsetšená chë unga bnëtsana y esconëfta soye jasachënjëse, ntšamo chënga jacastígana monduamancá.

25 Unga soye niñëbéngaca šmonjanëtsjanganja, y ndëtsbéngaca canye šmonjanatëchënganja. Unga soye chë atše sënjánenjaquena barco tontsanenatjëmbe, y chca ora, canye šonjanotocá, chë mar béjayoca tsachocana bënoca canye ibeta jëftsebobínynana y canye te jëftsejétanana.

26 Atše becá sënjánana, y chca atšbiana resjo enjamna bëts fshajayënguiñe y uacucuatsënga chašmuebiatbëbama; resjo cach atšbe entšángbentše, judiënga y ndoñe judiëngbentše; resjo bëts pueblënguentše, entsanga ndoyenentše y mar béjayoca. Atšbiámnaca resjo enjamna chë Jesucrístbeyeca atšbiana catšátanga imomna ca jtsichámuana, pero ndegombre chca ndoñe mondmënëngbeñe.

27 Atše bëts cá tijatrabajá empás uamëntšnaya joquédantscuana; ba soye tijachnëngo ibeta ntsamanacá y ba soye tijachnëngo shëntseca y uajuendayá; ba soye ndayá jasama ntsebo mncá; tijasufri sësnama y tondaye entšayama.

28 Quem soyëngama y inye ndoñe chiyátayana soyëngama más, atše cada te natjëmbana ainánaca ndoñe queschbatsmëna, er ndoñe quetsátstatsëmbo ntšamo nyetsca ošbuachiyëngcá enefjuanënga imojtsiyenana.

29 Ndánaca tšabe soye jamama tondaye añemo tontsebomna ora, atše chabiamá šochandbóngmia, mo átšnaca cach tondaye añémoca cuabndětsemncá. Nderado ínŷenga tnojama ndánaca bacna soyiñe chaótsatšama, atše ndegombre puerte ngménaca chandbétsesufrina.

30 Nderado nŷa tojátsiyta atše ndayama jatenábotamnayama, as chē atše tondaye obenana ndbomná tsmēnama ínŷanŷnaye soyēngama chtsenábotamnaye.

31 Bēngbe Bētšá y Bēngbe Utabná Jesucristbe Taitá, ndábioye nŷetscanga nŷetsca tescama jtsatschuanayama entsamna, cha endětatsšēmo atše ndegombre stsichámuama chē sēntsoyebuambná soyēnguiñe.

32 Atše Damasco bētš puebloca sēnjamna ora, chē rey Aretasbe uabuáyana mandado tojanmandá chē puebloye amashjuaniñe soldadēnga chamotsebojanŷama, atše chašmishachama chējana stse-bocana ora;

33 pero básefta enutēnga, canŷe sbarēcuiñe šmontsanēstjango chē pueblentša shēconana tapiēšiñe canŷe atēfjnējana, y chca atše sēnjanobená chēngbe cucuatšentšana jótšbocana.

12

Ndayá Pablo mo otjenayoquēcá tojáninŷe y ndayá Satanás tojanma, Pablo chaosufrima

1 Atše šontsemna más jtsenábotamnayana, masque chca tcojamentšana ndocna tšabe soye ntjóbocnana. Mora chanjóyebuambaye, chē mo

otjenayoquëcá sënjinÿe Bëngbe Bëtsabe soyëngama y Bëngbe Utabná sojinÿinÿé soyëngama.

² Atşe canÿe entşá sënduábuatma, cha Crísoftaca cánÿiñe mo canÿacá endmëna y nda bnëtsana canta uata entsemna, Bëngbe Bëtsá tbojanánatse, chë celoca más tsbanánoye, Bëngbe Bëtsá yomnoye. Atşe ndoñe quetsátstatsëmbo Bëngbe Bëtsá cha tbojanánatse chabe cuérpoca o nÿe chabe espiritiñe. ¡Nÿe Bëngbe Bëtsá chama yotátşëmbo!

³⁻⁴ Atşe sëndëtatşëmbo Bëngbe Bëtsá chë entşábioye celoye tbojanánatsama, nÿetscanga oyejuayënga imomnoye (atşe ndoñe quetsátstatsëmbo Bëngbe Bëtsá tbojanánatse chabe cuérpoca o nÿe chabe espiritiñe; nÿe Bëngbe Bëtsá chama yotátşëmbo), y chentşe cha tojanuena palabrënga, ndocná bontsemna jayanama palabrënga, chë ndayama entşangbiana ndoñe yontselesenciana jatichámuana.

⁵ Atşe chë entşá sëndmëna. Canÿe entşá ndáftaca chca tojopasabiama, tşabá nántsemna chama jtsenábotamnayana; pero cach atşbiana jtsenábotamnayana ndoñe tşabá ntsemnana, ndayá nÿe chë atşe mo obenana ndbomnacá tsmënama inÿinÿnaye soyëngama chantsenábotamnaye.

⁶ Y nderado jtsenábotamnayama atşe stseboşe, chca ora atşe ndoñe stsama mo canÿe opá tojtsoyebuambnacá, er ntşamo ndegombre yomncá atşe stsichamo. Pero chca ndoñe quetsátama, chca, ndocná chaondëtsejuabná ntşamo atşbiana tbojtsinÿanama o ntşamo atşbiana cha tojouenama atşe más tsmëna ca.

⁷ Chíyeca, tşa uamaná tsjamna ca atşe ntjátsjuabnayama, atşe chë Bëngbe Bëtsá tşa bëts

soyënga tbojaninÿinÿé entsá bétsemnayeca, Bëngbe Bëtsá tojanma atše chaitsebomna ndáyeca puerte chaisufrima, mo canÿe bëts uchmašëfja atšbe cuerpiñe tojtsashacuancá, mo Satanásbe íchmona soy cá, atše chaisufrima chaomama.

⁸ Unga soye Bëngbe Utabná sënjaimpadá chca sufrínana chašotsebojuánama;

⁹ pero Bëngbe Utabná šonjauyana: “Nÿe atšbe bonshánana endmëna lempe ntšamo cmojtsajabotcá; nÿetscanga atšbe obenana más tšabá jinÿana, chë obenana ndbomna entsángbeñe atšbe obenana stjínÿanÿiye ora ca.” Chcasna, atše puerte oyejuayá chanjóyebuambaye chë atše mo obenana ndbomnacá tsmënama inÿinÿnaye soyëngama, Cristbe obenana átšbeñe sempre chaotsomñama.

¹⁰ Chíyeca, Cristo jasérviamá, oyejuayá chandbétsemna atše mo obenana ndbomnacá stsemna ora, ínÿenga šmojtsoyenguá ora, puerte padecena soyënga causa ndayá jamama ndoñe sëntsetatsëmbo ora, atše puerte chaisufrima ínÿenga tmojtsama ora y puerte tšetsëna ainánaca stsemna ora; er chca soyënguiñe stsemna ora, mo canÿa obenana ndbomnacá, chora Bëngbe Bëtsá jamana atše ainaniñe bëts añemo chaitsebomnama.

Nderado ndayá Corintoca ošbuáchiyënga muan-jamama Pablo yojánauatja

¹¹ Atše chca chë soyëngama sëntsenabotamná ora sënjoyebuambá mo canÿe opá tojtsoyebuambnacá, pero ndegombre tšëngaftanga šmonjama atše chca chaimama. Er tšëngaftanga šmondmëna ndëmuanÿenga yojtsamna atšbiama puerte

tšabá jtsichámuana, atše chca jtsenábotamnyama ndoñe chašondětsemnama. Ndegombre, atše tondayiñe más batšá uamaná quetsátsmëna, chë Jesucristbe puerte uámana ichmónënga imomna ca juabnayëngbiama, masque atše šontsebiona mo atše tondaye cuaftsamancá.

12 Canya Jesucristbe ndegombre ichmoná bétsemnama inyinynaye soyënga, tšëngaftangbeñe tonjanopasá atše choca sënjamna ora. Chca, chë Bëngbe Bëtsabe obenana inyinynaye soyënga y chë tšabe soyënga ntšamo chora tonjanopasacá, puerte tšabá jtsinyanynayana atše canye ndegombre ichmoná tsmënama; y atše chca sënjanma, padecena soyënguiñe puerte uantado jtsemnëse.

13 ¿Ndayá tšëngaftanga ndoñe cachcá šmonjanóyëngacñe chë inye luarenache ošbuachiyëngcá enefjuanëngbiama? Canye soye aíñe, er tšëngaftangbioye tondaye ntjotjañcá, atše ndoñe chiyatslesenciá tšëngaftanga atšbe opresidama chašmuájabuachama, ntšamo inye ošbuáchiyënga aíñe sënjalesenciácá. Smochtseperdóna chca bacna soye tšëngaftangbiama tijamama.

14 Atše ya sëntseprontana, móracna unga soyama jama tšëngaftanga jányama, y mora atše cach ndoñe quebochataimpáda atšbe opresidama chašmuatájabuachama. Atše ndoñe quetsátsoše chë tšëngaftanga šmobomna soye jatsbomnana, ndayá puerte sëntseboše tšëngaftanga Cristo sempre chašmotseservénama. Atše chca jamama sëntseboše, er atše

tšëngaftangbiana mo canye taitacá, Crístbeñe šmointsanošbuachéyeca, atše chabiana tcbonjanabuayená ora; sëntsejuabná chë taitanga inétsamna crocénana jájuabana básenga jtsanÿenama, y ndoñe básenga chë taitangbiana.

¹⁵ Y atše corente oyejuayá lempe ntšamo tsbomncá chanjátsataye, y atše jopochócantscuanënaca, tšëngaftangbe tšabiana. Atše cada te más cbojtsababuánÿeshanëse, ¿tšëngaftanga más batšá atše šmochtsebobonshana?

¹⁶ Ndoñe; tšëngaftanga tšabá šmondétatšëmbo, atše uajabotá sënjamna ora, atše tondaye tcbonjanótjañama. Masque chca, básëftanga imojtsichamo ntšamo ínÿenga ndayíñnaca jáingñama atše tstátšëmbo ca, chëngbentsana crocénana josháchiñama; y atše catijama, ínÿenga jáingñase, nÿe ntšamo atše tsbošcá chamotsamama ca.

¹⁷ ¿O nderado atše tchojaingñé, canya chë tšëngaftangbioye sënjichamó chentšáftaca?

¹⁸ Tito sënjanimpadá tšëngaftanga jáñyama chaot-sama, y cháftaca sënjanichmó chë inÿa bëngcá Crístbeyeca bëngbe catšata. ¿Nderado Tito tcmojaingñé? ¿Ndoñe ndegombre yondmëna, Tito y atše cachcá fstsjuabná y fstsboše y cachca soyënga jtsamëse ftsiyena? Ndegombre chca endmëna.

¹⁹ Nderado tšëngaftanga šmojatsjuabná bënga jenëuyanama chca cbojtsëtsëtsná ca; pero ndoñe chca quenátsmëna. Inÿetsá, bënga Crísoftaca cánÿiñe mo canÿacá entšangcá, Bëngbe Bëtsabe delante fsëntsoyebuambná, y lempe ntšamo tijayancá, Jesucrístbeyeca atšbe bonshana catšátanga, tšëngaftangbe tšabiana tijayana,

Crístbeñe corente chašmotsošbuáchema y ainaniñe bēts añemo chašmotsebomnama.

²⁰ Er atše sēntsauatja, atše jányama chaijá ora, ndoñe chacbondányena ntšamo tsbošcá, y tšëngaftanga atše ndoñe chašmondínýena ntšamo šmojtsebošcá. Sēntsauatja nderado bacna soyënga šmattsama: jtsenpenzentserana, ínýengaftaca yapa jtsenántšabošana, ndayánaca rábiaca jtsamana, nýe tšëngaftangbiana tšabe soyënga jtsebomnama jtsebošana, ínýengbiana podesca ichámuana, uayátsenayënga jtsemnana, ínýengbiana cachënga más uámanënga jtsenobiamnayana, y nýetscanga ndoñe cachcá ntsejuabnayana. Chca chacbojánýenëse, tšëngaftanga ndoñe quešmochátsbošena jóyëngacñana ntšamo tšëngaftanga jucácanama atše šochtsemncá.

²¹ Atše sēntsauatja, cachiñe jányama chaijá ora, atšbe Bētsá chaoma atše chaitsëuatja chca šmojtsamama, y chašotsemna puerte ngménaca jošachnama ba tšëngaftangbiana, ndëmuanýenga ya bayté bacna soyënga imojtsama y chca juabnayana ndoñe tmonjatrocá, y ndoñe tmonjajbaná chë bacna soyënga boyabása o shembásaftaca jtsamama juabnayana, y chca soyënga jtsamana y nýetsca bacna soyënga jtsamana, jenomándama ntsoyencá.

13

Inýe soyëngama jábuayenama y jádiošoftama

¹ Móraca ya unga soyama tšëngaftanga jányama chanjá. Atše chaijáshjango ora, tojtseiýtëse chanjayana ntšamo báseftanga tmojamcá tšabá o ndoñe

tšabá bétsemnana. Nda bacna soye ntšamo Moisesbe leyiñe endëmandancá tojama ora, atše chanjayana cha ndoñe tšabá tonjama ca; pero útata o únganga tmojtsemnëse, chënga chamuayanama cha ndegombre chca tojamama.

² Atše tempo sënjanabuayená, chë tšëngaftanguentsënga bacna soye tmojánamënga y chë ínÿenga, atše šojtsanmëna jácastigana, chca soyënga amana ndoñe tmonjájbananga. Mora, tšëngaftangbentsana bënoca sëntsemna ora, cachiñe cachcá cbëtëtabuayená, ntšamo sënjanamcá chë tšëngaftangaftaca uta soyama sënjamna ora: atše cachiñe jáñÿama chajjase, ndoñe quichatsleséncia bacna soyënga chašmotsamama y chama ntjacastigacá jatabáshejuanana.

³ Atše chca chanjama, er tšëngaftanga šmontsenguá ndayánaca tšabá chacminÿanÿema Cristo atšbiajana yoyebuambnana. Cristo ndoñe quenátsmëna mo canÿa obenana ndbomnacá, ntšamo tšëngaftangaftaca cha tojamama; ndayá chabe bëts obenana tšëngaftangbeñe bëtscá jtsinÿanÿayana.

⁴ Er cha tmojancrucificá mo canÿa obenana ndbomnacá; pero mora, Bëngbe Bëtsá puerte obená betsómñeyeca, cha tojtayena. Cachcá bëngnaca, cháftaca cánÿiñe mo canÿacá jtsemnëse, mo obenana ndbomnëngcá jtsemnana; pero cháftaca mochantsiyena, Bëngbe Bëtsá puerte obená betsómñeyeca, tšëngaftanga jtsaservénama.

⁵ Tšëngaftanga cada ona šmochjshénojuaboye, tšabá jtsetatšëmbuama mocna entšanga bétsemnana, jtsetatšëmbuama aíñe o ndoñe

sempre Crístbeñe puerte tašmuetsošbuáchema. Smochjshénojuaboye chca šmošbuáchema ntšamo šmojtsemnama y tšabá ínÿenga smochjínÿanÿiye. ¿Ndoñe šmondétatšëmbo Jesucristo tšëngaftangbe ainaniñe yoyenama? Ndoñesna, tšëngaftanga ndegombre ndoñe Crístbeñe ošbuáchiyënga šmontsemna.

⁶ Pero atše sëntsobátmana tšëngaftanga ndegombre chašmotsejuabnama bënga Jesucristbe ndegombre ichmónënga ftsmënama.

⁷ Y Bëngbe Bëtsá fsëntseimpadana bacna soye ndoñe chašmondétsamama, ndoñe chë Jesucristbe ndegombre ichmónënga ftsmënama tšëngaftanga jinÿanÿiyama, ndayá ntšamo tšabá yomncá chašmotsamama. Nÿetscanga chca tmojtsamëse, nántsinÿna mo Cristbe ndegombre ichmónënga bënga ndoñe cuabndmëncá, er chca ndoñe tašuatátëjaboto jinÿanÿiyana ntšamo bënga bëngbe mándoca ftsmënama mo ichmonëngcá, tšëngaftanga jábuayenama. Pero chë soye tondayana šattsentšamna,

⁸ er bënga queftsátobena tondaye jamana Bëngbe Bëtsabe ndegombre soyëngama contra; nÿe ntšamo chabe ndegombre soyënga yomncá aíñe.

⁹ Bënga fsëntseboše ntšamo tšabá yomncá tšëngaftanga chašmotsamama, er bënga oyejuayënga fchandbétsemna, bënga mo chë obenana ndbomnëngcá fstsemna ora, bëngbe mando jácastigama ntjatinÿanÿnayscá, y tšëngaftanga ainaniñe bëts añémoca šmojtsemna ora y puerte tšabá šmojtsemnanda ora. Bënga Bëngbe Bëtsá fchandbétseimpadana, chca bacna soyënga amana jtsajbanase, chašmobená jtsemnana nÿetsca

soyënguiñe tšábenga, y lempe ntšamo tšëngaftanga chašmotsemnama Bëngbe Bëtsá yobošcá.

10 Quem tsbuanácha cbontsëbuabiamná tšëngaftangaftaca cabá ndoñe sëntsemna ora; chca, atše choye chajjá ora ndoñe chašondëtsemna jabuache jucácanana, mo canya puerta mandayacá, ntšamo Bëngbe Utabná šojanbemcá, tšëngaftanga jujabuáchama chábeñe corente chašmotsošbuáchema y ainaniñe bëts añemo chašmotsebmnama, y ndoñe tšëngaftanga jatapochócama.

11 Morna, Jesucristbeyeca atšbe catšátanga, tšabá chašmotsomñe, šmochtsajbaná chca bacna soyënga amana y šmochtsemna lempe ntšamo Bëngbe Bëtsá yobošcá. Šmochjouena ntšamo tcbonjabuayenacá, nyetscanga cachcá šmochtsejuabnaye, nyetscángaftaca natjëmbana šmochtsiyena, y Bëngbe Bëtsá, chë cmondababuanjeshaná y tšëngaftangbe ainaniñe tšabe ebionana chašmotsebmnama endamá, tšëngaftangaftaca echántsemna.

12 Nyetscanga šmochjenchuaye mo Jesucristbeyeca catšatangcá, jtenámochëse, ntšamo cach tšëngaftangbe pamíllanga puerta bonshanánaca šmondbetsacheuanaycá.

13 Nyetsca quem luaroca ošbuáchiyënga cmontsacheuaná.

14 Atše, Bëngbe Bëtsá sëntseimpadana, Bëngbe Utabná Jesucristo chaoma, nyetsca tšëngaftangbeñe tšabe bendicionënga chaotsemnama. Bëngbe Bëtsabe bonshánana sempre chašmotsóbomñe, y Uámana Espíritu sempre chašmotsóbomñe, y

chë Uámana Espíritoftaca cányĩñe mo canyãcá
chašmotsomñe.

Bëngbe Bëtsa Cabëngaftaca Entsoyebuambna New Testament in Camsá

copyright © 2009 Wycliffe Bible Translators, Inc.

Language: Camsá

Translation by: Wycliffe Bible Translators, Inc.

Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Camsá

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

PDF generated using Haiola and XeLaTeX on 18 Apr 2025 from source files
dated 29 Jan 2022
19104c0e-9046-5ff3-82fb-eb838c88dcf9